

水經注釋

ル 5
139
7





139
7

水經注釋卷十七

渭水上

仁和趙一清誠夫錄

渭水出隴西首陽縣渭谷亭南烏鼠山

渭水出首陽縣首陽山渭首亭南谷山在烏鼠山西北
此縣有高城嶺嶺上有城號渭源城渭水出焉三源合
注東北流逕首陽縣西與別源合水南出烏鼠山渭水
出谷尚書禹貢所謂渭出烏鼠者也地說曰烏鼠山同
穴之枝幹也渭水出其中東北流過同穴枝間既言其
過明非一水也又東北流而會于殊源也渭水東南流

逕首陽縣南右得封溪水次南得廣相溪水次東得其
谷水左則天馬溪水次南則伯陽谷水竝參差翼注亂
流東南出矣

又北過襄武縣北

廣陽水出西山二源合注共成一川東北流注于渭渭
水又東南逕襄武縣東北荆頭川水入焉水出襄武西
南烏鼠山荆谷東北逕襄武縣故城北王莽更名相桓
漢護羌校尉溫序行部爲隗囂部將苟宇所拘銜鬢自
刎處也其水東北流注于渭渭水常若東南不東北也
又東泉水注之水出西南雀富谷東北逕襄武縣南東

北流入于渭魏志稱咸熙二年襄武上言大人見身長
三丈餘跡長三尺二寸白髮著黃單衣巾拄杖呼民王
始語云今當太平十二月天祿永終歷數在晉遂遷魏
而事晉

又東過獮道縣南

右則岑溪水次則同水其左則過水合注之渭水東南
逕獮道縣故城西昔秦孝公西斬戎之獮王于此應劭
曰獮戎邑也漢靈帝中平五年別爲南安郡赤亭水出
郡之東山赤谷西流逕城北南入渭水渭水又逕城南
得粟水水出西南安都谷東北流注于渭渭水又東新

興川水出西南烏鼠山二源合舍東北流與彰川合水
出西南溪下東北至彰縣南本屬故道候尉治後漢縣
之永元元年和帝封耿秉爲侯國也萬年川水出南山
東北流注之又東北注新興川又東北逕新興縣北晉
書地道記南安之屬縣也其水又東北與南川水合水
出西南山下東北合北水又東北注于渭水渭水又東
逕武城縣西武城川水入焉津源所導出鹿部西山兩
源合注東北流逕鹿部南亦謂之鹿部水又東北昌邱
水出西南邱下東北注武城水亂流東北注渭水渭水
又東入武陽川又有關城川水出南安城谷水出北邱

川參差注渭水渭水又東逕落門西山

一清按章懷後漢書註曰隴西

縣東南有落門山落門水出焉

東流三府谷水注之三川統一東北流

注于渭水有落門聚昔馮異攻落門未拔而薨建武十
年來歛又攻之擒隗囂子純隴右平渭水自落門東至
黑水峽左右六水夾注左則武陽溪水東北得土門谷
水俱出北山南流入渭右則溫谷水次東有故城溪水
次東有閭里溪水亦名習溪水次東有黑水竝出南山
北流入渭渭水又東出黑水峽歷冀川

又東過冀縣北

一清按說文驥下云天水有驥縣是驥字

渭水自黑水峽至岑峽南北一十水注之北則溫谷水

注之其水導源平襄縣南山溫溪東北流逕平襄縣故
 城南故襄戎邑也王莽之所謂平相矣其水東南流歷
 三堆南又東流而南屈入黃槐川一清按此處有脫字梗津渠冬
 則輟流春夏水盛則通川注渭次則午谷水南入渭水
 南有長塹谷水次東有安蒲溪水次東有衣谷水竝南
 出朱圉山山在梧中聚有石鼓不擊自鳴鳴則兵起漢
 成帝鴻嘉三年天水冀南山有大石自鳴聲隱隱如雷
 有頃止聞于平襄二百四十里野雞皆鳴石長丈三尺
 廣厚略等在崖脇去地二百餘丈民俗名曰石鼓石鼓鳴
 則有兵是歲廣漢鉗子攻死囚盜庫兵略吏民衣繡衣

自號為山君黨與寢廣明年冬伏誅自歸者三千餘人
 信而有徵矣其水北逕冀縣故城北秦武公十年伐冀
 戎縣之故天水郡治王莽更名填戎縣曰冀治漢明帝
 永平十七年改曰漢陽郡城即隗囂稱西伯所居也後
 漢馬超之圍冀也涼州別駕閻伯儉潛出水中將告急
 夏侯淵為超所擒令告城無救伯儉曰大軍方至咸稱
 萬歲超怒數之伯儉曰卿欲令長者出不義之言乎遂
 殺之渭水又東合冀水水出冀谷次東有濁谷水次東
 有當里溪水次東有託里水次東有渠谷水次東有黃
 土川水俱出南北山逕冀城東而北流注于渭渭水又

東出岑峽入新陽川逕新陽下城南溪谷赤蒿二水竝出南山東北入渭水渭水又東與新陽崖水合即隴水也東北出隴山其水西流隴右逕瓦亭南隗囂聞略陽陷使牛邯守瓦亭即此亭也其水亦出隴山東南流歷瓦亭北又西南合為一水謂之瓦亭川一清按寰宇記氏縣有瓦亭一名薄落亭今本續志云烏枝有瓦亭出薄落谷蓋有缺文疑當作烏枝有瓦亭一名薄落亭瓦亭水出薄落谷也西南流逕清賓溪北又西南與黑水合水出黑城北西南逕黑城西西南流莫吾南川水注之水東北出隴垂西南流歷黑城南注黑水黑水西南出懸鏡峽又西南入瓦亭川又有澁水自西來會世謂之鹿角

口一清按漢志安定郡烏氏縣烏水出西北入河都盧山在西莽曰烏亭劉昭郡國志補註曰本傳有龍池山地道記曰烏水出焉烏水即黑水之異名乎寰宇記潘原縣烏水出都盧山有西烏水又東北逕烏氏縣東注于涇謂之閣川水然涇水間有石巖東會兩川也西烏水即所謂澁水自西來會者也懸鏡峽即所謂石巖乎又隴西記曰襄武縣有錦鏡峽即黑水所經其峽四望花木明媚影其中因名漢志云入河而此注云入渭寰宇記云入涇涇渭合流蓋由渭以達于河也又南逕阿陽縣故城東中平元年北地羌胡與邊章侵隴右漢陽長史蓋勳屯阿陽以拒賊即此城也其水又南與燕無水合水源延發東山西注瓦亭水瓦亭水又南左會方城川西注瓦亭水瓦亭水又南逕成紀縣東歷長離川謂之長離水右與成紀水合水導源西北當亭川東流出破石峽津流遂

斷故瀆東逕成紀縣故帝太皞庖犧所生之處也漢氏
 以為天水郡縣句王莽之阿陽郡治也一清按漢志莽
 戎此又云阿陽蓋是支郡改天水郡為填又東潛源隱發通之成紀水
 所謂大郡至分為五者也東南入瓦亭川水又東南與受渠水相會水東出大
 隴山西逕受渠亭北又西南入瓦亭川水又西南流
 歷僵人峽路側巖上有死人僵尸巒穴故岫壑取名焉
 釋鞍就穴直上可百餘仞石路透迤劣通單步僵尸倚
 窟枯骨尚全唯無膚髮而已訪其川居之士云其鄉中
 父老作兒童時已聞其長舊傳此當是數百年骸矣其
 水又西南與略陽川水合水出隴山香谷西流右則單

溪西注左則閣川水入焉其水又西歷蒲池郊石魯水
 出東南石魯溪西北注之其水又西入略陽川西得破
 社谷水次西得平相谷水又西得金里谷水又西得南
 室水又西得蹶谷水竝出南山北流于略陽城東揚波
 北注川水又西逕略陽道故城北湓渠水出南山北逕
 湓峽北入城建武八年中郎將來歛與祭遵所部護軍
 王忠右輔將軍朱寵將二千人皆持鹵刀斧自安民縣
 之楊城永始二年成帝罷安定呼他苑以為安民縣起
 官寺市里全氏曰永始二以下二十二字是注中山
 按漢書此是平帝元始二年事師古曰中山
 之安定也平帝以中山王入正大統則宜是中山之安
 定呼他即呼池善長所引誤矣班志無安民縣蓋暫置

而即省者一清按劉昭郡國志補注安定郡臨涇縣下
引謝承書曰宣仲為長史民叛畱改宜民見李固傳而
志無此改豈承之妄乎宜民疑即安民之訛蓋西京已
有是稱不始于宣仲昭以承說為妄當矣又地理志鉅
鹿郡有安定縣其故城在今祁州東鹿縣西七里此即
中山之安定也元和志深州鹿城縣東至州二十五里
本漢安定縣地屬鉅鹿郡隋開皇三年改為鹿城取縣
東故鹿城為名滹沱河在縣西北四十二里苑蓋取水
為從番須回中伐樹木開山道至略陽夜襲擊囂拒守
將軍金梁等皆殺之因保其城隗囂聞略陽陷悉眾以
攻歙激水灌城光武親將救之囂走西城世祖與來歙
會于此其水自城北注川一水二川蓋囂所竭以灌略
陽也川水西得白楊泉又西得蒲谷水西得蒲谷西川
又西得龍尾溪水與蒲谷水合俱出南山飛清北入川

水又西南得水洛口水源東導隴山西逕水洛亭西南
流又得犢奴水口水出隴山西逕犢奴川又西逕水洛
亭南西北注之亂流西南逕石門峽謂之石門水西南
注略陽川略陽川水又西北流入瓦亭水瓦亭水又西
南出顯親峽石宕水注之水出北山山上有女媧祠庖
羲之後有帝女媧焉與神農為三皇矣其水南流注瓦
亭水瓦亭水又西南逕顯親縣故城東南漢封大鴻臚
竇固為侯國白石宕次得蝦蟆溪水又得金黑水又得
宜都溪水咸出左右參差相入瓦亭水又東南合安夷
川口水源東出胡谷西北流歷夷川水與東陽川水會

謂之取陽交又西得何宕川水又西得羅漢水竝自東北西南注夷水夷水又西逕顯親縣南西注瓦亭水瓦亭水又東南得大華谷水又東南得折里溪水又東得六谷水皆出近溪湍峽注瓦亭水又東南出新陽峽崖岫壁立水出其間謂之新陽崖水又東南流入于渭是也

又東過上邽縣

渭水東歷縣北封山之陰流逕固嶺東北東南流蘭渠川水出自北山帶佩眾溪南流注于渭渭水東南與神澗水合開山圖所謂靈泉池也俗名之爲萬石灣淵深

不測實爲靈異先後漫遊者多離其斃渭水又東南得歷泉水北出歷泉溪東南流注于渭渭水又東南出橋亭西又南得藉水口水出西山百澗聲流總成一川東歷當亭川卽當亭縣治也左則當亭水注之右則曾席水入焉又東與大弁川水合水出西山二源合注東歷大弁川東南流注于藉水藉水又東南流與竹嶺水合水出南山竹嶺二源同瀉東北入藉水藉水又東北入上邽縣左佩五水東會占溪水次東有大魯谷水次東得小魯谷水次東有楊反谷水咸自北山流注藉水藉水右帶五水竹嶺東得亂石溪水次東得木門谷水次

東得羅城溪水次東得山谷水皆導源南山北流入藉
水藉水又東黃瓜水注之其水發源黃瓜西谷東流逕
黃瓜縣北又東清溪白水左右夾注又東北大旱谷水
南出旱溪歷澗北流泉溪委漾同注黃瓜水黃瓜水又
東北歷赤谷咸歸于藉藉水又東合毛泉谷水又東逕
上邽縣故城南又得覈泉水竝出南山北流注于藉藉
水卽洋水也北有濛水注焉水出縣西北邽山翼帶眾
流積以成溪東流南屈逕上邽縣故城西側城南出上
邽故邽戎國也秦武公十年伐邽縣之舊天水郡治清
按晉志魏志天水郡皆治上邽與兩漢之治冀縣異道元故分別言之五城相接北城中

有湖水有白龍出是湖風雨隨之故漢武帝元鼎三年

改爲天水郡

一清按漢志天水郡師古引秦中記云郡前湖水冬夏無增減因以名焉其鄉

居悉以板蓋屋詩所謂西戎板屋也濛水又南注藉水

山海經曰邽山濛水出焉而南流注于洋謂是水也藉

水又東得陽谷水又東得宕谷水竝自南山北入于藉

藉水又東合段溪水水出西南馬門溪東北流合藉水

藉水又東入于渭渭水又歷橋亭南而入縣諸縣東與

東亭水合亦謂之爲橋水也清水又或爲通稱矣水源

東發小隴山眾川瀉浪統成一水西入東亭川爲東亭

水與小祗大祗二水合又西北得南神谷水三川竝出

東南差池瀉注又有埋蒲水翼帶二川與延水竝西南注東亭水東亭水又西右則曠溝水次西得麴谷水水側出東南二溪西北流注東亭川東亭川水右則溫谷水出小隴山又西蒞谷水出南山蒞溪西南注東亭川水東亭川水又西得清水口清水導源東北隴山二源俱發西南出隴口合成一水西南流歷細野峽逕清池谷又逕清水縣故城東王莽之識陸縣矣其水西南合東亭川謂之清水口又逕清水縣故城南又西與秦水合水出東北大隴山秦谷二源雙導歷三泉合成一水而歷秦川川有故秦亭秦仲所封也秦之爲號始自是

一清按地理志曰孝王曰昔伯益知禽獸子孫不絕矣乃封爲附庸邑之于秦今隴西秦亭秦谷是也郡國志曰豬坻秦水西逕降隴縣故城南又西南自亥松多聚有秦亭

一清按松多胡名也晉大興二年屠各胡松多起兵二附晉王保據草壁劉曜攻拔之松多奔隴城是也
水出隴山合而西南流逕降隴城北又西南注秦水秦水又西南歷隴川逕六槃口過清水城西南注清水清水上下咸謂之秦川又西羌水注焉水北出羌谷引納眾流合以成溪澍水星會謂之小羌水西南流左則長谷水西南注之右則東部水東南入焉羌水又南入清水清水又西南得縣諸水口其水導源西北縣諸溪東南與長思水合北出長思溪南入縣諸水又東南歷縣

諸道故城北東南入清水清水東南注渭渭水又東南
合涇谷水水出西南涇谷之山東北流與橫水合水出
東南橫谷西北逕橫水壙又西北涇谷水亂流西北出
涇谷峽又西北軒轅谷水注之水出南山軒轅溪南安
姚瞻以爲黃帝生于天水在上邽城東七十里軒轅谷
皇甫謐云生壽邱邱在魯東門北未知孰是也其水北
流注涇谷水又西北合白城溪東北流白娥泉水出其
西東注白城水白城水又東北入涇谷水涇谷水又東
北歷董亭下楊難當使兄子保宗鎮董亭卽是亭也其
水東北流注于渭山海經曰涇谷之山涇水出焉東南

流注于渭是也渭水又東伯陽谷水入焉水出刑馬山
之伯陽谷北流白水出東南白溪西北注伯陽水伯陽
水又西北歷谷引控羣流北注渭水又東歷大利又東
南流苗谷水注之水南出刑馬山北歷平作西北逕苗
谷屈而東逕伯陽城南謂之伯陽川蓋李耳西入往逕
所由故山原畎谷往往播其名焉渭水東南流眾川瀉
浪邊次鳴注左則伯陽東溪水注之次東得望松水次
東得毛六溪水次東得皮周谷水次東得黃杜東溪水
並出北山南入渭水其右則胡谷水次東得邱谷水次
東得邱谷東溪水次東有銅巖谷水並出南山東北注

渭渭水又東南出石門度小隴山逕南由縣南東與楚水合世所謂長蛇水水出汧縣之數厯山也南流逕長蛇戍東魏和平三年築徙諸流民以遏隴寇楚水又南流注于渭闕駟以是水爲汧水焉又東汧汧二水入焉余按諸地志汧水出汧縣西北闕駟十三州志與此同復以汧水爲龍魚水蓋以其津流逕通而更攝其通稱矣渭水東入散關抱朴子神仙傳曰老子西出關關令尹喜候氣知真人將有西遊者遇老子彊令之著書耳不得已爲著道德二經謂之老子書也有老子廟干寶搜神記云老子將西入關關令尹喜好道之士覩真人

當西乃要之途也皇甫士安高士傳云老子爲周柱下史及周衰乃以官隱爲周守藏室史積八十餘年好無名接而世莫知其真人也至周景王十年孔子年十七遂適周見老聃然幽王失其道平王東遷關以捍移人以職徙尹喜候氣非此明矣而往逕所由茲焉或可渭水又東逕武功縣西北俗以散關名城非也褚先生乃曰武功扶風西界小邑也蜀口棧道近山無他豪易高者是也渭水又與捍水合水出周道谷北逕武都故道縣之故城西王莽更名曰善治也故道縣有怒特祠列異傳曰武都故道縣有怒特祠云神本南山大梓也昔

秦文公二十七年伐之樹瘡隨合秦文公乃遣四十人
持斧斫之猶不斷疲士一人傷足不能去臥樹下聞鬼
相與言曰勞攻戰乎其一曰足爲勞矣又曰秦公必持
不休答曰其如我何又曰赤灰跋於子何如乃默無言
臥者以告令士皆赤衣隨所斫以灰跋樹斷化爲牛入
水故秦爲立祠其水又東北歷大散關而入渭水也渭
水又東南右合南山五谿水夾澗流注之也

又東過陳倉縣西

縣有陳倉山山上有陳寶雞鳴祠昔秦文公感伯陽之
言遊獵于陳倉遇之于北坂得若石焉其色如肝歸而寶

祠之故曰陳寶其來也自東南暉暉聲若雷野雞皆鳴

故曰雞鳴神也地理志曰有上公明星黃帝孫舜妻

冢祠有羽陽宮秦武王起應劭曰縣氏陳山姚睦一清按上

云南安姚瞻此云姚睦未
知卽一人也抑誤字也曰黃帝都陳言在此榮氏開

山圖注曰伏犧生成紀徙治陳倉也非陳國所建也魏

明帝遣將軍太原郝昭築陳倉城成諸葛亮圍之亮使

昭鄉人靳祥說之不下亮以數萬攻昭千餘人以雲梯

衝車地道逼射昭昭以火射連石拒之亮不利而還今

汧水對亮城是與昭相禦處也陳倉水出于陳倉山下

東南流注于渭水渭水又東與綏陽谿水合其水上承

斜水水自斜谷分注綏陽谿北屆陳倉入渭故諸葛亮
與兄瑾書曰有綏陽小谷雖山崖絕重谿水縱橫難用
行軍昔邏候往來要道通人今使前軍斫治此道以向
陳倉足以扳連賊勢使不得分兵東行者也渭水又東
逕郁夷縣故城南地理志曰有泝水祠王莽更之曰郁
平也東觀漢記曰隗囂圍來歙於略陽世祖詔曰桃花
水出船槃皆至郁夷陳倉分部而進者也泝水入焉水
出泝縣之蒲谷鄉弦中谷決爲弦蒲藪爾雅曰水決之
澤爲泝泝之爲名實兼斯舉水有二源一水出縣西山
世謂之小隴山巖嶂高嶮不通軌轍故張衡四愁詩曰

我所思兮在漢陽欲往從之隴坂長其水東北流歷澗
注以成淵潭漲不測出五色魚俗以爲靈而莫敢採捕
因謂是水爲龍魚水自下亦通謂之龍魚川川水東逕
泝縣故城北史記秦文公東獵泝田因遂都其地是也
又東歷澤亂爲一水右曰龍泉泉逕五尺源流奮通淪
漪四泄東北流注于泝泝水又東會一水發南山西側
俗以此山爲吳山三峯霞舉疊秀雲天崩巒傾返山頂
相捍望之恆有落勢地理志曰吳山在縣西古文以爲
泝山也國語所謂虞矣山下石穴廣四尺高七尺水溢
石空懸波側注湍湲震盪發源成川北流注于泝自水

水經注卷十七

會上下咸謂之龍魚川汧水又東南逕隃麋縣故城南

王莽之扶亭也昔郭欽恥王莽之微而逕跡於斯按漢

書鮑宣傳是郭欽然郭欽有二一在王莽傳見於鮑宣

傳者不受莽徵閉戶而終見于王莽傳者仕莽為戊巳

校尉拜填外將軍封剽胡子後列于九虎兵敗守倉降

于更始封侯姓名同而行事絕不相侔今道元以不受

莽徵者為郭欽則是與世本漢書異抑或六

朝古本原是欽字而訛而為欽未可知也建武四年

光武封耿況為侯國矣汧水東南歷慈山東南逕郁夷

縣一清按下逕平陽故城南史記秦甯公二年徙平陽

徐廣曰故郿之平陽亭也城北有漢邠州刺史趙融碑

靈帝建安元年立一清按靈帝紀元為建甯獻帝紀元

為建安未知靈字誤也抑安字訛也

汧水又東流注于渭渭水之右礪谿水注之水出南山

茲谷乘高激流注于谿中谿中有泉謂之茲泉泉水潭

積自成淵渚即呂氏春秋所謂太公釣茲泉也今人謂

之凡谷石壁深高幽隍邃密林障秀阻人跡罕交東南

隅有一石室蓋太公所居也水次平石釣處即太公垂

釣之所也其投竿踞餌兩鄰遺跡猶存是有礪谿之稱

也其水清冷神異北流十二里注于渭北去維堆城七

十里渭水又東逕積石原即北原也青龍二年諸葛亮

出斜谷與司馬懿一清按下有脫文屯渭南雍州刺史郭淮策

亮必爭北原而屯遂先據之亮至果不得上渭水又東

逕五丈原北魏氏春秋曰諸葛亮據渭水南原司馬懿

水經注卷十七

水經注釋卷十七終

謂諸將曰亮若出武功依山東轉者是其勇也若西上五丈原諸君無事矣亮果屯此原與懿相禦渭水又東逕郿縣故城南地理志曰右輔都尉治魏氏春秋諸葛亮寇郿司馬懿據郿拒亮即此縣也

水經注釋卷十七終

海甯錢保塘 華陽吳祖椿 覆校

水經注釋卷十八

仁和趙一清誠夫錄

又東過武功縣北

渭水於縣斜水自南來注之水出縣西南衙領山北歷糾谷逕五丈原東諸葛亮與步騭書曰僕前軍在五丈原原在武功西十里餘水出武功縣故亦謂之武功水也是以諸葛亮表云臣遣虎步監孟琰據武功水東司馬懿因水長攻琰營臣作竹橋越水射之橋成馳去其水北流注于渭地理志曰斜水出衙領北至郿注渭渭

水經注釋卷十八

水又東逕馬冢北諸葛亮與步騭書曰馬冢在武功東十餘里有高勢攻之不便是以畱耳渭水又逕武功縣故城北王莽之新光也地理志曰縣有太壹山古文以為終南杜預以為中南也亦曰太白山在武功縣南去長安二百里不知其高幾何俗云武功太白去天三百山下軍行不得鼓角鼓角則疾風雨至杜彥達曰太白山南連武功山於諸山最為秀傑冬夏積雪望之皓然山上有谷春祠春櫟陽人成帝時病死而尸不寒後忽出櫟南門及光門上而入太白山民為立祠于山嶺春秋來祠中止宿焉山下有太白祠民所祀也劉曜之世

是山崩長安人劉終於崩所得白玉方一尺有文字曰皇亡皇亡敗趙昌井水竭構五梁罅西小衰困囂喪嗚呼嗚呼赤牛奮鞞其盡乎時羣臣畢賀中書監劉均進曰此國滅之象其可賀乎終如其言矣渭水又東溫泉水注之溫水出太壹山其水沸涌如湯杜彥達曰可治百病世清則疾愈世亂則無驗其水下合溪流北注十三里入渭渭水又東逕釐縣故城南舊郃城也后稷之封邑矣即詩所謂有郃家室也城東北有姜嫄祠城西南百步有稷祠郃之釐亭也王少林之為郃縣也路經此亭亭長曰亭凶殺人少林曰仁勝凶邪何鬼敢忤遂

宿中夜聞女子稱冤之聲少林曰可前來理女子曰無衣不敢進少林投衣與之女子前訴曰妾夫為涪令之官過宿此亭為亭長所殺少林曰當為理寢冤勿復害良善也因解衣于地忽然不見明告亭長遂服其事亭

遂清安渭水又東逕雍縣一清按下水雍山一清按雍山上當云雍水

出雍山漢志右扶風武功縣有淮水祠疑雍水祠之誤寰宇記鳳翔府天興縣下云雍水在縣北二里源出西北平地而李應祥雍勝略云雍山在鳳翔縣西北三十里雍水出應劭曰四面積高曰雍以其積高亦可謂之山也關中地勢多積高如風涼原白鹿原斯類非一又康海武功縣志云雍原即周原周原在岐山下則雍山殆即岐山

東南流歷中罕溪世謂之中罕水亦曰冰井之水阜乎

水南流逕胡城東俗名也蓋秦惠公之故居所謂祈年

宮也孝公又謂之橐泉宮按地理志曰在雍崔駰曰穆

公冢在橐泉宮祈年觀下劉向曰穆公葬無邱壠處也

史記曰穆公之卒從死者百七十七人良臣子車氏奄

息仲行鍼虎秦人哀之為之賦黃鳥余謂崔駰及皇覽

繆志也惠公孝公竝是穆公之後繼世之君矣子孫無

由起宮於祖宗之墳陵矣以此推之知二證之非實也

雍錄曰據鄭此言則是惠公所都雍縣有祈年宮至孝

公命為橐泉名雖兩出其實一宮也又引崔駰之言從

而辨正其失則是祈年橐泉皆在惠公雍都而亦不知

何人所建獨漢書曰惠公所起也黃圖祈為斬且曰穆

公造廟記曰宮在城外而始皇本紀則曰在雍皆以世

遠難究其的也一清按史記秦本紀云穆公卒葬雍裴

駰集解引皇覽曰秦穆公冢在橐泉祈年觀下皇覽

魏志以為文帝命劉劭集魏略以為皇象受詔撰崔駰

是漢章帝時人今文止有崔駰之說無皇覽之辭而云知二證之非實蓋有缺失又漢志注橐泉宮孝公起祈年宮孝公起是有所未喻矣而左會左陽水世名之西水泰之不知引此所未喻矣

北出左陽谿南流逕岐州城西魏置岐州刺史治左陽水又南流注于雍水雍水又與東水合俗名也北出河

桃谷南流右會南源世謂之返眼泉亂流南逕岐州城東而南合雍水州居二水之中南則兩川之交會也世亦名之為涿空水東流鄧公泉注之水出鄧艾祠北故名曰鄧公泉數源俱發於雍縣故城南縣故秦德公所居也晉書地道記以為西虢地也漢書地理志以為西虢縣

一清按漢志宏農郡陝縣下云西虢在雍州而無西虢縣之目右扶風虢縣有虢宮秦宣太后起即

所謂西 太康記曰虢叔之國矣有虢宮平王東遷叔自此之上陽為南虢矣

何氏曰按杜預云陝縣東南有虢城即西虢國乃虢仲所封大陽之下陽城蓋其別都河東宏農地界相接非兩國也滎陽新鄭之虢為虢叔所封在陝縣之南故當年虢仲之北虢亦得西虢之名若右扶風之虢與周室二虢無與然則善長誤矣方輿紀要云桃虢城在寶雞縣東五十里古虢君之支屬史記秦武公十一年滅小虢即雍有此地今有桃虢二城相距十餘里俗亦謂桃虢川雍有五時祠以上祠祀五帝

雍一清按此注有訛誤地理志云百三所郊祀志云秦襄公攻戎救周列為諸侯而居西自以為主少昊之神作西時祀白帝文公東獵汧渭之間夢黃蛇自天下屬地其口止于郿旁故有吳陽武時用三牲郊祭白帝焉自未作郿時雍故有吳陽武時祭東有好事皆廢而無祀德公卜居雍之諸祠自此與後宣公作密時于渭南祭青帝靈公于吳陽作上時祭黃帝作下時祭炎帝獻公作畦時櫟陽而祀白帝高祖立黑帝祠名曰北時除武時好時非秦所立襄公居西

水經注釋 卷十八 四

垂宮在隴西則西時非雍可知文公鄜時在鄜縣獻公
畦時在櫟陽是又不在雍也雍之五時封禪書云唯雍
四時上帝為尊索隱曰雍有五時而言四者顧氏以為
兼下文上帝為五非也西時鄜時皆非雍密時並上時
下時畦時是為四并高祖增黑帝而五也小司馬以畦
時當雍四時之一而寰宇記鳳翔府天興縣有三時原
引封禪書鄜時密時吳陽上時而云三時在此原亦謂
之周原則反遺卻雍之下時矣章懷後漢書馮衍傳註
亦但引史記曰秦并天下祠雍四時漢加黑帝謂之五
時而不列指四時之目其義終莫能明顧祖禹以為五
秦時也五時漢時也此三五之名所由分昔秦文公田
于泝渭之間夢黃蛇自天屬地其口止于鄜衍以為上
帝之神於是作鄜時祠白帝秦宣公作密時於陳倉北
坂祀青帝焉靈公又於吳陽作上時祀炎帝焉獻公作
畦時祀赤帝焉一清按此文與封禪書郊祀志全相乖
廷秦宣公作密時于雍不干陳倉北坂

在陳倉北坂者是陳寶祠乃文公作今以陳寶為鄜時
非矣靈公作吳陽上時祭黃帝作下時祭炎帝索隱曰
吳陽地名蓋在岳之南上云雍有故吳陽武時蓋因武
時又作上下時以祭黃帝炎帝今云上時祀炎帝誤也
史記櫟陽雨金獻公自以為得金瑞作畦時櫟陽而祀
白帝漢書云祀上帝字之譌也今云祀赤帝赤即炎也
更為漢高帝問曰天有五帝今何四也博士莫知其故
帝曰我知之矣待我而五遂立北時祀黑帝焉應劭曰
四面積高曰雍闕駟曰宜為神明之隩故立羣祀焉又
有鳳臺鳳女祠秦穆公時有簫史者善吹簫能致白鶴
孔雀穆公女弄玉好之公為作鳳臺以居之積數十年
一旦隨鳳去云雍宮世有簫管之聲焉今臺傾祠毀不
復然矣鄧泉東流注于雍自下雖會他津猶得通稱故

禹貢有雍沮會同之文矣

全氏曰善長誤矣豈可以充州之雍沮釋岐西之水道乎

雍水又東逕邵亭南世謂之樹亭川蓋邵樹聲相近誤

耳亭故邵公之采邑也京相璠曰亭在周城南五十里

後漢郡國志曰郿縣有邵亭謂此也一清按詩周南召

貢雍州岐山之陽地名今屬右扶風美陽縣史記燕召

公世家註譙周云周之支族食采于召謂之召公索隱

曰召者畿內采地夷始食邑于召故曰召公或說者以

為文王受命取岐周故墟召地封爵二公故詩有周南

召南言皆在岐山之陽故言南也魏書地形志武功郡

美陽縣有邵亭方輿紀要鳳翔府鳳翔縣有召城亦曰

召亭是也而郡國志曰郿有邵亭即上蔡縣蔡亭也班

志云右扶風蔡縣周后稷所封師古曰讀與邵同音胎

善長誤記邵作邵以君夷之食采證皇祖之始封舛謬

甚矣王伯厚詩地理攷引注云雍水東注邵亭南黃本

亦是邵字朱氏箋皆改作邵

字殆又從而為之辭者耶

雍水又東南流與杜水合

水出杜陽山其水南流謂之杜陽川東南流左會漆水

水出杜陽縣之漆谿謂之漆渠故徐廣曰漆水出杜陽

之岐山者是也漆渠水南流大巒水注之水出西北大

道川東南流入漆即故岐水也淮南子曰岐水出石橋

山東南流相如封禪書曰收龜于岐朱氏謀埠箋曰漢

曰周放畜餘龜于池沼之中至漢得之于岐山之傍漢書音義曰岐水名也謂斯

水矣二川並逝俱為一水南與杜水合俗謂之小橫水

亦或名之米流川逕岐山西又屈逕周城南城在岐山

之陽而近西所謂居岐之陽也非直因山致名亦指水

取稱矣又歷周原下北則中水鄉成周聚故曰有周也

卷十八

水經注釋

一清按漢志右扶風美陽縣禹貢岐山在西北中水鄉周太王所邑

盜食穆公馬處也岐水又東逕姜氏城南為姜水按世

本炎帝姜姓帝王世紀曰炎帝神農氏姜母安登一清按二

皇紀作游華陽感神而生炎帝長于姜水合而東逕美

陽縣之中亭川水也水發杜陽縣大嶺側世謂之赤泥

峴沿波歷澗俗名大橫水也疑即杜水矣其水東南流

東逕杜陽縣故城東西三百步南北二百步世謂之故

縣川又故號縣有杜陽山山北有杜陽谷有地穴北入

亦不知所極在天柱山南震宇記鳳翔府岐山縣下云

象曰岐山在崑崙山東南為地乳上多白金周之興也

鸞鷲鳴于山上時人亦謂此山為鳳凰堆注水經云天

柱山有鳳凰祠或云其峯高峻迥出諸山狀若柱因以為名一清按御覽及程克齋春秋分記並引之今缺失矣

故縣取名焉亦指是水而攝目矣即王莽之通杜也

故地理志曰縣有杜水一清按漢志右扶風杜陽縣杜

縣之詩曰人之初生自土沮漆齊詩作又東二坑水注

之水有二源一水出西北與瀆魑水合而東歷五將山

又合鄉谷水水出鄉谿東南流入杜謂之鄉谷川又南

茨水注之一清按名勝志引注作莫水方輿紀要云莫

水亦曰莫谷水震宇記武功縣下引水經注

云莫谷水逕美陽縣與中亭水出好時縣梁山大嶺東

南逕梁山宮西故地理志曰好時有梁山宮秦始皇起

水東有好時縣故城王莽之好邑也世祖建武二年封

建威大將軍耿弇為侯國又南逕美陽縣之中亭川注

雍水謂之中亭水又南逕美陽縣西永元二年更封鄣

雍侯耿秉為侯國一清按後漢書耿秉傳秉以章和二

道縣注云渭水東北流與彰川合東北至彰縣南永元

元年和帝封耿秉為侯國是秉先嘗封彰侯後更封美

陽足補范書之其水又南流注于渭渭水又東逕郿塢

南漢獻帝傳曰董卓發卒築郿塢高與長安城等積穀

為三十年儲自云事成雄據天下不成守此足以畢老

其愚如此渭水又東洛谷之水出其南山洛谷北流逕

長城西魏甘露三年蜀遣姜維出洛谷圍長城即斯地

也

又東芒水從南來流注之

芒水出南山芒谷北流逕玉女房水側山際有石室世

謂之玉女房芒水又北逕盩厔縣之竹園中分為二水

漢沖帝詔曰翟義作亂於東霍鴻負倚盩厔芒竹即此

也日知錄幼主謂之沖帝水其水分為二流一水之東

北為支流一水北流注于渭也

水經注釋卷十八終

海甯錢保塘
華陽吳祖椿覆校

水經注釋卷十九

仁和趙一清誠夫錄

渭水下

補豐水

補涇水

補芮水

渭水又東過槐里縣南又東澇水從南來注之

渭水逕縣之故城南漢書集註李奇謂之小槐里之西城也又東與芒水枝流合水受芒水於竹園東北流又屈而西北入于渭渭水又東北逕黃山宮南即地理志所謂縣有黃山宮惠帝二年起者也東方朔傳曰武帝微行西至黃山宮故世謂之游城非也就水注之水出南山就谷北逕大陵西世謂之老子陵昔李耳為周柱

下史以世衰入戎於此有冢事非經證然莊周著書云老聃死秦失弔之三號而出是非不死之言人稟五行之精氣陰陽有終變亦無不化之理以是推之或復如傳古人許以傳疑故兩存耳就水厯竹圃北與黑水合水上承三泉就水之右三泉奇發言歸一瀆北流左逕就水就水又北流注于渭渭水又東合田谿水水出南山田谷北流逕長楊宮西又北逕蓋屋縣故城西又東北與一水合水上承蓋屋縣南源北逕其縣東又北逕思鄉城西又北注田谿田谿水又北流注于渭水也縣北有蒙龍渠上承渭水於郿縣東逕武功縣為成林渠

東逕縣北亦曰靈軹渠漳渠以引堵水徐廣曰一作諸

川是也一清按漢書地理志云靈軹渠武帝穿溝洫志注如瀆曰韋水出韋谷渭水又東

逕槐里縣故城南縣古大邱邑也周赧王都之朱氏箋曰帝王

世紀及世本並云懿王自鎬徙都大邱此作赧王字之誤耳秦以為廢邱亦曰舒邱

和平元年桓帝沈氏曰是靈帝中平封左中郎將皇甫嵩為侯國

縣南對渭水北背通渠史記秦本紀云秦武王三年渭

水赤三日秦昭王三十四年渭水又大赤三日沈氏曰秦本紀

中無此文而漢書五行志引之再考之則洪範五行傳武王事見重敘秦世系中而昭王事終佚

曰赤者火色也水盡赤以火沴水也渭水秦大川也陰陽亂秦用嚴刑敗亂之象後項羽入秦封司馬欣為塞

王都櫟陽董翳為翟王都高奴章邯為雍王都廢邱居
槐里為三秦漢祖北定三秦引水灌城遂滅章邯三年
改曰槐里王莽更名槐治也世謂之為大槐里晉太康
中始平郡治也其城遞帶防陸舊渠尙存即漢書所謂
槐里環隄者也東有涌水出南山赤谷東北流逕長楊
宮東宮有長楊樹因以為名涌水又北逕葦圃西亦謂
之仙澤又北逕望仙宮又東北耿谷水注之水發南山
耿谷北流與柳泉合東北逕五柞宮西長楊五柞二宮
相去八里並以樹名宮亦由陶氏以五柳立稱故張晏
曰宮有五柞樹在整厓縣西其水北逕仙澤東北又逕

望仙宮東又北與赤水會又北逕思鄉城東又北注渭
水渭水又東合甘水水出南山甘谷北逕秦文王萇陽
宮西又北逕五柞宮東又北逕甘亭西在甘水之東鄂
縣昔夏啟伐有扈作誓于是亭故馬融曰甘有扈南郊
地名也寰宇記鄂縣下引水經注曰扈水上承扈陽池
一清按此處引有扈以證甘水故知脫文於此
也甘水又東得澇水口水出南山澇谷北逕漢宜春觀
又東北逕鄂縣故城西澇水際城北出合漢陂水水出
宜春觀北東北流注澇水北流入於渭一清按說文澇
渭漢志無即上林故地也東方朔稱武帝建元中微行
北至池陽西至黃山南獵長楊東游宜春夜漏十刻乃

出與侍中常侍武騎待詔及隴西北地良家子能騎射者期諸殿下故有期門之號旦明入山下馳射鹿豕狐兔手格熊羆上大驪樂之上乃使太中大夫虞邱壽王與待詔能用竿者舉籍阿城以南盤屋以東宜春以西提封頃畝及其賈直屬之南山以爲上林苑東方朔諫秦起阿房而天下亂因陳泰階六符之事上乃拜太中大夫給事中賜黃金百斤卒起上林苑故相如請爲天子游獵之賦稱烏有先生亡是公而奏上林也

又東豐水從南來注之

地說云渭水又東與豐水會於短陰山內水所匯處無

他高山異巒所有唯原阜石激而已水上舊有便門橋

與便門對直武帝建元三年造張昌曰橋在長安西北

茂陵東如淳曰去長安四十里杭氏世駿曰漢書註張昌作服虔如淳作蘇林

渭水又逕太公廟北廟前有太公碑文字禿缺今無可

尋渭水又東北與鎬水合水上承鎬池於昆明池北周

武王之所都也故詩云考卜維王宅是鎬京維龜正之

武王成之自漢武帝穿昆明池於是地基構淪禿今無

可究雍錄曰諸家皆言自漢武帝穿昆明池後鎬京故

池一名元阨在昆明池北始皇毀之寰宇記云鎬泉在

華陰縣東十九里其水或涌或止深不可測括地圖云

謂之鎬池春秋後傳曰使者鄭容入柏谷關至平舒置

見華山有素車白馬問鄭容安之答曰之咸陽車上人
 曰吾華山君使願託書致鄗池君子之咸陽過鄗池見
 大梓下有文石取以款扣梓當有應者以書與之勿妄
 發致之得所欲鄭容行至鎬池見一梓下果有文石取
 以款梓應曰諾鄭容如睡覺而見宮闕若王者之居焉
 謁者出受書入又見頃聞語聲言祖龍死神道茫昧理
 難辨測效無以精其幽致矣鎬水又北流西北注與澎
 池合水出鄗池西而北流入於鎬毛詩云澎流浪也而
 世傳以為水名矣鄭元曰豐鎬之間水北流也鄗水北
 逕谿靈臺西

一清按谿靈臺谿字誤也朱氏謀璋箋云宋本作漢靈臺竊謂似是而實非也御覽

及長安志引此文作清泠臺與今本異朱氏家多古書
 未必無據魏書地形志京兆郡長安縣有周靈臺方輿
 紀要長安縣靈臺下引三輔故事曰周靈臺在鄠縣豐
 水東鄠縣豐城下云左傳昭四年楚椒舉曰康有鄠宮
 之朝杜預曰鄠宮有靈臺康王於是朝諸侯孔穎達曰
 鄠去長安鎬池二十五里又曰靈臺在縣東北周靈臺
 也志云鄠宮又東二十五里又曰靈臺在縣東北周靈臺
 所謂經始靈臺者也春秋僖十五年秦晉戰于韓獲晉
 侯以歸舍諸靈臺是也又曰三輔故事曰漢靈臺在長
 安故城西北八里本秦之清臺漢曰靈臺郭緣生述征
 記長安宮中有靈臺高十五仞水經注漢靈臺在秦阿
 房宮南去明堂三百步鎬水逕其西漢平帝元始四年
 立觀此則豐宮之靈臺為周而長安之靈臺為漢鄠注
 既于長安城下紀漢靈臺矣於此又云漢靈臺不幾複
 與寰宇記引水經注作清靈臺是也蓋清臺之名不始
 于秦康志賀述禮統云夏為清臺商為神臺周為靈臺
 毛公詩傳曰神之清明稱靈四方而高曰臺且亦有清
 靈合稱者史記封禪書公孫卿曰黃帝就青靈臺十二
 日燒也黃圖曰漢靈臺在長安西北八里又周文王靈
 臺在長安西北四十里高二丈周四百二十步明有

周漢之分呂圖亦云漢舊城外有靈臺北與未央宮對
此卽漢靈臺與鄠宮之靈臺無涉也中尉知改谿字之
誤而不知漢字之亦屬臆說與事義大相乖謬者也玉
海引水經注曰鄠水北逕靈臺西文王又引水爲辟靡
靈沼此等文句今皆脫失無
惑乎後人之但憑私見也 又逕磁石門西門在阿房
前悉以磁石爲之故專其目令四夷朝者有隱甲懷刃
入門而脅之以示神故亦曰却胡門也鄠水又北注於
渭渭水北有杜郵亭去咸陽十七里今名孝里亭中有
白起祠嗟乎有制勝之功慙尹商之仁是地卽其伏劍
處也渭水又東北逕渭城南文穎以爲故咸陽矣秦孝
公之所居離宮也獻公都櫟陽天雨金周太史儋見獻
公曰周故與秦國合而別別五百歲復合合七十歲而

霸王出至孝公作咸陽築冀闕而徙都之故西京賦曰
秦里其霸實爲咸陽太史公曰長安故咸陽也漢高帝
更名新城武帝元鼎三年別爲渭城在長安西北渭水
之陽王莽之京城也始隸扶風後并長安而沈水注之
一清按沈字是沈字之誤地理志右扶風鄠縣下云灃
水北過上林苑入渭師古曰灃卽今沈水或作沈與沈
相似因名沈水灃水今則改名人不
識也然則沈字之譌所由來舊矣 其水上承皇子陂
於樊川其地卽杜之樊鄉也漢祖至櫟陽以將軍樊噲
灌廢邱最賜邑于此鄉也其水西北流注杜縣之杜京
西西北流逕杜伯冢南杜伯與其友左儒仕宣王儒無
罪見害杜伯死之終能報恨于宣王故成公子安五言

詩曰誰謂鬼無知杜伯射宣王沈水又西北逕下杜城
卽杜伯國也沈水又西北支合故渠渠有二流上承交
水合於高陽原而北逕河池陂東而北注沈水沈水又
北與昆明故池會又北逕秦通六基東又北逕竭水陂
東又北得陂承其陂東北流入於沈水沈水又北逕長
安城西與昆明池水合水上承池於昆明臺故王仲都
所居也桓譚新論稱元帝被病廣求方士漢中送道士
王仲都詔問所能對曰能忍寒暑乃於盛寒日載以駟
馬車於昆明池上環冰而馳御者厚衣狐裘寒戰而仲
都獨無變色臥于池臺上矐然自若夏大暑日使暴坐

環以十爐火不言熱又身不汗池水北逕鎬京東秦阿
房宮西史記曰秦始皇三十五年以咸陽之人多先王
之宮小乃作朝宮于渭南亦曰阿城也始皇先作前殿
阿房上可坐萬人下可建五丈旗周馳爲閣道自殿直
抵城南山表山巔爲闕爲複道自阿房度渭屬之咸陽
象天極閣道絕漢抵營室也關中記曰阿房殿在長安
西南二十里殿東西千步南北三百步庭中受十萬人
其水又屈而逕其北東北流注竭水陂陂水北出逕漢
武帝建章宮東於鳳闕南東注沈水又北逕鳳闕東三
輔黃圖曰建章宮漢武帝造周二十餘里千門萬戶其

東鳳闕高七丈五尺俗言貞女樓非也漢武帝故事云闕高二十丈關中記曰建章宮圓闕臨北道有金鳳在闕上高丈餘故號鳳闕也故繁欽建章鳳闕賦曰秦漢規模廓然毀泯唯建章鳳闕巋然獨存雖非象魏之制亦一代之巨觀也沈水又北分爲二水一水東北流一水北逕神明臺東傅子宮室曰上于建章中作神明臺井幹樓咸高五十餘丈皆作懸閣輦道相屬焉三輔黃圖曰神明臺在建章宮中上有九室今人謂之九子臺而卽實非也沈水又逕漸臺東漢武帝故事曰建章宮北有大液池池中有漸臺高三十丈漸浸也爲池水所

漸一說星名也南有璧門三層高三十餘丈中殿十二間階陛咸以玉爲之鑄銅鳳五丈飾以黃金樓屋上椽首薄以玉璧因曰璧玉門也沈水又北流注渭亦謂是水爲澗水也故呂忱曰澗水出杜陵縣漢書音義曰澗水聲而非水也亦曰高都水前漢之末五侯王氏大治池沼引沈水入長安城故百姓歌之曰五侯初起曲陽最怒壞決高都竟連五杜土山漸臺象西白虎卽是水也

又東過長安縣北

渭水東分爲二水廣雅曰水自渭出爲渠其由河之有

雍也此瀆東北流逕魏雍州刺史郭淮碑南又東南合一水逕兩石人北秦始皇造橋鐵鑿重不勝故刻石作力士孟賁等像以祭之鑿乃可移動也又東逕陽侯祠北漲輒祠之此神能爲大波故配食河伯也後人以爲鄧艾祠悲哉讒勝道消專忠受害矣渭水又東注此水水上有梁謂之渭橋秦制也亦曰便門橋秦始皇作離宮於渭水南北以象天宮故三輔黃圖曰渭水貫都以象天漢橫橋南度以法牽牛南有長樂宮北有咸陽宮欲通二宮之間故造此橋廣六丈南北三百八十步六十八間七百五十柱一百二十二梁橋之南北有隄激

立石柱柱南京兆主之柱北馮翊主之有令丞各領徒一千五百人橋之北首壘石水中故謂之石柱橋也舊有忖留神像此神嘗與魯班語班令其神出忖留曰我貌猶醜卿善圖物容我不能出班于是拱手與言曰出頭見我忖留乃出首班于是以腳畫地忖留覺之便還沒水故置其像于水唯背以上立水上後董卓入關遂焚此橋魏武帝更修之橋廣三丈六尺忖留之像曹公乘馬見之驚又命下之燕丹子曰燕太子丹質于秦秦王遇之無禮乃求歸秦王爲機發之橋欲以陷丹丹過之橋不爲發又一說交龍捧輦而機不發但言

朱氏謀
瑋箋曰

水經注卷十九 渭水

謝云疑有脫誤今不知其故處矣渭水又東與沈水枝津合水

上承沈水東北流逕鄧艾祠南又東分爲二水一水東

入逍遙園注蕩池池中有臺觀蓮荷被浦秀實可翫其

一水北流注于渭渭水又東逕長安城北漢惠帝元年

築六年成一清按漢書惠帝紀元年城長安三年春發

長安六百里內男子十四萬六千人城長安

三十日罷注鄭氏曰城一面故速罷又五年九月長安

城成六年起長安西市也而史記呂后紀云惠帝三年

方築城四年就半五年六年城就索隱曰漢宮闕疏四

年築東面五年築北面漢舊儀城方六十三里經緯各

十二里三輔舊事卽咸陽也秦離宮無城故城之王莽

云城形似北斗也更名常安十二門東出北頭第一門本名宣平門王莽

更名春王門正月亭亦曰東城門其郭門亦曰東都門

一清按漢書王莽傳無東字卽逢萌挂冠處也第二門本名清明門

一曰凱門王莽更曰宣德門布恩亭內有藉田倉亦曰

藉田門第三門本名霸城門王莽更名仁壽門無疆亭

民見門色青又名青城門或曰青綺門亦曰青門門外

舊出佳瓜昔廣陵人邵平爲秦東陵侯秦破爲布衣種

瓜此門瓜美故世謂之東陵瓜是以阮籍詠懷詩曰昔

聞東陵瓜近在青門外連畛拒阡陌子母相鉤帶指謂

此門也南出東頭第一門本名覆盎門王莽更名永清

門長茂亭其南有下杜城應劭曰故杜陵之下聚落也

故曰下杜門又曰端門北對長樂宮第二門本名安門

亦曰鼎路門王莽更名光禮門顯樂亭即西安亭北對未央宮第三門本名平門王莽更名信平門誠正亭西出南頭第一門本名章門王莽更名萬秋門億年亭亦曰故光畢門也又曰便門第二門本名直門王莽更名直道門端路亭故龍樓門也張晏曰門樓有銅龍三輔黃圖曰長安西出第二門即此門也第三門本名西城門亦曰雍門王莽更名章義門著誼亭其水北入有函里氏名曰函里門又曰光門亦曰突門一清按此西出光門而北出西頭第一門曰橫門亦曰光門二門不應相同也程大昌曰以黃圖考之長安城北西從西數來第一門名橫門外有橋曰橫橋呂相長安圖呂証亦同又黃圖長安有九市其三在道東東市在突門夾橫

水經注卷十九 渭水

橋大道水經曰光門亦名突門在長安西從南來第三門正與黃圖呂圖之謂橫門者隅角相次故黃圖呂圖之謂在北者即與水經之謂突門光門為在北出西頭城西面者相應也今去古遠不敢以何為定北出西頭第一門本名橫門王莽更名霸都門左幽亭如淳曰音光故曰光門其外郭有都門有棘門徐廣曰棘門在渭北孟康曰在長安北秦時宮門也如淳曰三輔黃圖曰棘門在橫門外按漢書徐厲軍於此備匈奴又有通門亥門也其第二門本名洛門又曰朝門王莽更名建子門廣世亭一曰高門蘇林曰高門長安城北門也一曰廚門其內有長安廚官在東故名曰廚門也如淳曰今名廣門也第三門本名杜門亦曰利城門王莽更名進

水經注卷十九

和門臨水亭其外有客舍故名曰客舍門又曰洛門也
凡此諸門皆通達九達三途洞開隱以金椎周以林木
左出右入爲往來之徑行者升降有上下之別漢成帝
之爲太子元帝嘗急召之太子出龍樓門不敢絕馳道
西至直城門方乃得度上怪遲問其故以狀對上悅乃
著令令太子得絕馳道也渭水東合昆明故渠渠上承
昆明池東口東逕河池陂而北亦曰女觀陂又東合沈
水亦曰漕渠又東逕長安縣南東逕明堂南舊引水爲
辟雍處在鼎路門東南七里其制上圓下方九宮十二
堂四嚮五室堂北三百步有靈臺是漢平帝元始四年

立渠南有漢故圓丘成帝建始二年罷雍五時始祀皇
天上帝于長安南郊應劭曰天郊在長安南卽此也故
渠之北有白亭博望苑漢武帝爲太子立使通賓客從
所好也太子巫蠱事發斫杜門東出史良娣死葬于苑
北宣帝以爲戾園以倡優千人樂思后園廟故亦曰干
鄉故渠又東而北屈逕青門外與沈水枝渠會渠上承
沈水于章門西飛渠引水入城東爲倉池池在未央宮
西池中有漸臺漢兵起王莽死于此臺又東逕未央宮
北高祖在關東令蕭何成未央宮何斬龍首山而營之
山長六十餘里頭臨渭水尾達樊川頭高二十丈尾漸

下高五六丈土色赤而堅云昔有黑龍從南山出飲渭水其行道因山成跡山卽基闕不假築高出長安城北有元武闕卽北闕也東有蒼龍闕闕內有閭闔止車諸門未央殿東有宣室玉堂麒麟含章白虎鳳凰朱雀鸞鸞昭陽諸殿天祿石渠麒麟三閣未央宮北卽桂宮也周十餘里內有明光殿走狗臺柏梁臺舊乘複道用相逕通故張衡西京賦曰鉤陳之外閣道穹窿屬長樂與明光逕北通于桂宮故渠出二宮之間謂之明渠也又東歷武庫北舊樗里子葬于此樗里子名疾秦惠王異母弟也滑稽多智秦人號曰智囊葬于昭王廟西渭南

陰鄉樗里故俗謂之樗里子云我百歲後是有天子之宮夾我墓穴以昭王七年卒葬于渭南章臺東至漢長樂宮在其東未央宮在其西武庫直其墓秦人嘖曰力則任鄙智則樗里也明渠又東逕漢高祖長樂宮北本秦之長樂宮也周二十里殿前列銅人殿西有長信長秋永壽永昌諸殿殿之東北有池池北有層臺俗謂是池爲酒池非也故渠北有樓豎漢京兆尹司馬文預碑故渠又東出城分爲二渠卽漢書所謂王渠者也蘇林曰王渠官渠也猶今御溝矣晉灼曰渠名也在城東霸門外一水逕楊橋下卽青門橋也側城北逕鄧艾祠西

而北注渭今無水其一渠東逕奉明縣廣成鄉之廣明苑南史皇孫及王夫人葬于郭北宣帝遷苑南卜以爲悼園益園民千六百家立奉明縣以奉二園園在東都門昌邑王賀自霸御法駕郎中令龔遂驂乘至廣明東都門是也故渠東北逕漢太尉夏侯嬰冢西葬日樞馬悲鳴輕車罔進下得石槨銘云于嗟滕公居此室故遂葬焉冢在城東八里飲馬橋南四里故時人謂之馬冢又東過霸陵縣北霸水從縣西北流注之霸者水上地名也古曰滋水矣秦穆公霸世更名滋水爲霸水以顯霸功水出藍田縣藍田谷所謂多玉者也

西北有銅谷水次東有鞞谷水二水合而西注之又西流入湓水長安志劉谷水一名泥水引水經注曰水出藍田之東谷俗謂之劉谷西北與石門水合又石門谷水東有銅谷水合輕谷水西注泥水今本無之一清按輕谷水是鞞谷水之譌湓水又西逕嶢關北歷嶢柳城東西有二城魏置清湓軍于城內世亦謂之清湓城也秦二世三年漢祖入自武關攻秦趙高遣將拒于嶢關者也土地記曰藍田縣南有嶢關地名嶢柳道通荊州晉地道記曰關當上洛縣西北湓水又西北流入霸一清按漢志京兆南陵縣沂水出藍田谷北至霸陵入霸水而是注沂水源流正與班固所稱沂水合沂湓音同觀宋敏求引注佚文可見師古音沂爲先歷反蓋誤耳而道元引漢志則以滄水當之霸水又北歷藍田川逕藍田縣北竹書紀年梁

惠成王三年秦子向命爲藍君蓋子向之故邑也川有漢臨江王榮冢景帝以罪徵之將行祖于江陵北門車軸折父老泣曰吾王不反矣榮至中尉鄧都急切責王王年少恐而自殺葬于是川有鶯數萬銜土置冢上百姓矜之霸水又左合澧水厯白鹿原東卽霸川之西故芷陽矣史記秦襄王葬芷陽者是也一清按史記秦始皇紀重敘秦世系云昭襄享國五十六年葬芷陽索隱曰十九年而立葬芷陵也芷與茝同此是昭襄王之陵而其孫莊襄王亦葬芷陽卽所謂之霸上漢文帝葬其上謂之霸陵上有謂子楚陵也四出道以瀉水在長安東南三十里故王仲宣賦詩云南登霸陵岸迴首望長安漢文帝嘗欲從霸陵上西馳

下峻坂袁盎攬轡于此處上曰將軍怯也盎曰臣聞千金之子坐不垂堂百金之子立不倚衡聖人不乘危今馳不測如馬驚車敗奈高廟何上乃止霸水又北長水注之水出杜縣白鹿原其水西北流謂之荆谿荆谿水又西北左合狗枷川水水有二源西川上承礧山之斫槃谷次東有苦谷二水合而東北流逕風涼原西關中圖曰麗山之西川中有阜名曰風涼原在礧山之陰雍州之福地卽是原也其水徬谿北注原上有漢武帝祠其水右合東川水出南山之石門谷次東有孟谷次東有大谷次東有雀谷次東有土門谷五水北合而北厯

水經注釋 渭水下

風涼原東又北與西川會原為二水之會亂流北逕宣
帝許后陵東而北去杜陵十里斯川於是有狗柳之名
川東亦曰白鹿原也上有狗柳堡三秦記曰麗山西有
白鹿原原上有狗柳堡秦襄公時有天狗來下有賊則
狗吠之故一堡無患故川得厥目焉一清按北齊書昭
帝紀云時有天狗
下亦其類也山海經有獸亦名天狗焉西山經曰陰山
有獸焉其狀如狸而白首名曰天狗其音榴榴可以禦
凶吳任臣廣註引事物紺珠云川水又北逕杜陵東元
帝初元元年葬宣帝杜陵北去長安五十里陵之西北
有杜縣故城秦武公十一年縣之漢宣帝元康元年以
杜東原上為初陵更名杜縣為杜陵也王莽之饒安也

其水又北注荆谿荆谿水又北入霸水又有溫泉入焉
水發自亭下入荆谿水亂流注于霸俗謂之澆水非也
史記音義文帝出安門注云在霸陵縣有故亭即郡國
志所謂長門亭也史記曰霸澆長水也雖不在祠典以
近咸陽秦漢都涇渭長水盡得比大川之禮一清按史
記封禪書
云霸產長水澧澆涇渭皆非大川以近咸陽盡得昔文
比山川祠今注云云是抄變其詞而失其義也帝居霸陵北臨厠指新豐路示慎夫人曰此走邯鄲道
也因使慎夫人鼓瑟上自倚瑟而歌悽愴悲懷顧謂羣
臣曰以北山石為榭用紵絮斲陳漆其間豈可動哉釋
之曰使其中有可欲雖錮南山猶有隙使無可欲雖無

水經注釋 卷十九

石郭又何戚焉文帝曰善拜廷尉韋昭曰高岸夾水爲
廁今斯原夾二水也霸水又北會兩川又北故渠左出
焉霸水又北逕王莽九廟南王莽地皇元年博徵天下
工匠壞撤西苑建章諸宮館十餘所取材瓦以起九廟
竿及吏民以義入錢穀助成九廟廟殿皆重屋太初祖
廟東西南北各四十丈高十七丈餘廟半之爲銅薄櫨
飾以金銀雕文窮極百工之巧禱高增下功費數百巨
萬卒死者萬數霸水又北逕枳道在長安縣東十三里
王莽九廟在其南漢世有白鷺羣飛何氏曰亭林云當
作白蛾一清按事
見漢書元帝紀自東都門過于枳道呂后祓除于霸上
建昭元年也

還見倉狗擻脅于斯道也水上有橋謂之霸橋地皇三
年霸橋木災自東起卒數千以水汎沃救不滅晨燬夕
盡王莽惡之下書曰甲午火橋乙未立春之日也予以
神明聖祖黃虞遺統受命至於地皇四年爲十五年正
以三年終冬絕滅霸駁之橋欲以興成新室統一長存
之道其名霸橋爲長存橋霸水又北左納漕渠絕霸右
出焉東逕霸城北又東逕子楚陵北皇甫謐曰秦莊王
葬于芷陽之麗山京兆東南霸陵山劉向曰莊王大其
名立墳者也戰國策曰莊王字異人更名子楚故世人
猶以子楚名陵一清按史記始皇之父爲莊襄王索隱
以爲葬陽陵寰宇記雍州萬年縣下云

霸岸在通化門東二十里秦襄王葬于其坂謂之霸上
有城卽秦繆公所築漢爲縣在東北二十三里霸水東
霸陵故城是也東南至漢文帝陵十里又東逕新豐縣右會故渠上承霸

水東北逕霸城縣故城南漢文帝之霸陵縣也王莽更

之曰水章魏文帝黃初元年何氏曰文當作明黃當作

注中然後漢書方術傳注引此正同豈唐初所傳之本
已譌謬不可讀耶書不經劉向揚雄之手其孰爲是正

哉徙長安金狄重不可致因雷霸城南人有見薊子訓

與父老共摩銅人曰正見鑄此時計爾日以近五百年

矣故渠又東北逕劉更始冢西更始二年爲赤眉所殺

故侍中劉恭夜往收而埋之光武使司徒鄧禹收葬于

霸陵縣更始尙書僕射行大將軍事鮑永持節安集河

東聞更始死歸世祖累遷司隸校尉行縣逕更始墓遂

下拜哭盡哀而去帝問公卿太中大夫張湛曰仁不遺

舊忠不忘君行之高者帝乃釋之又東北逕新豐縣右

合漕渠漢大司農鄭當時所開也以渭難漕命齊水工

徐伯乃發卒穿渠引渭合渠自昆明池南徂山原東至

于河且田且漕大以爲便霸水又北逕秦虎圈東列士

傳曰秦昭王會魏王魏王不行使朱亥奉璧一雙秦王

大怒置朱亥虎圈中亥瞋目視虎背裂血出濺虎虎不

敢動卽是處也霸水又北入于渭水渭水又東會成國

故渠渠魏尙書左僕射衛臻征蜀所開也號成國渠引

以澆故田一清按漢志郿縣成國渠北至上林入蒙其龍渠蓋西京已有是渠衛公振更修治之
瀆上承泃水于陳倉東東逕郿及武功槐里縣北渠左有安定梁巖冢碑碣尚存又逕漢武帝茂陵南故槐里之茂鄉也應劭曰武帝自爲陵在長安西北八十餘里漢武帝故事曰帝崩後見形謂陵令薛平曰吾雖失勢猶爲汝君奈何令吏卒上吾陵磨刀劍乎自今以後可禁之平頓首謝因不見推問陵徇果有方石可以爲礪吏卒常盜磨刀劍霍光欲斬之張安世曰神道茫昧不宜爲法乃止故阮公詠懷詩曰失勢在須臾帶劍上吾邱陵之西南如北一里卽李夫人冢冢形三成世謂之

葵陵夫人兄延年知音尤善歌舞帝愛之每爲新聲變曲聞者莫不感動嘗侍上起舞歌曰北方有佳人絕世而獨立一顧傾人城再顧傾人國甯不知傾城復傾國佳人難再得上曰世豈有此人乎平陽主曰延年女弟上召見之妖麗善歌舞得幸早卒上憫念之以后禮葬悲思不已賦詩悼傷故渠又北分爲二渠東逕虎圈南而東入霸一水北合渭今無水故渠又東逕茂陵縣故城南武帝建元二年置地理志曰宣帝縣焉王莽之宣成也故渠又東逕龍泉北今人謂之溫泉非也渠北故坂北卽龍淵廟如淳曰三輔皇圖有龍淵宮今長安城

西有其廟處蓋宮之遺也故渠又東逕姜原北渠北有漢昭帝平陵東南去長安七十里又東逕平陵縣故城南地理志曰昭帝置王莽之廣利也故渠之南有竇氏泉北有徘徊廟又東逕漢大將軍魏其侯竇嬰冢南又東逕成帝延陵南陵之東北五里卽平帝康陵坂也故渠又東逕渭陵南元帝永光四年以渭城壽陵亭原上爲初陵詔不立縣邑又東逕哀帝義陵南又東逕惠帝安陵南陵北有安陵縣故城也地理志曰惠帝置王莽之嘉平也渠側有杜郵亭又東逕渭城北地理志曰縣有蘭池宮秦始皇微行逢盜于蘭池今不知所在也

雍錄

曰咸陽縣東二十五里蘭池陂卽始皇遇盜之地漢于其北立池陽縣一清按漢志左馮翊池陽縣應劭曰在池水之陽劉昭郡國志補注引三秦記曰始皇引渭水爲長池東西二百里南北三十里刻石爲鯨魚長二百丈又東逕長陵南亦曰長山也三秦記曰長安城北有平原廣數百里民井汲巢居井深五十丈秦名天子冢曰山漢曰陵故通曰山陵矣風俗通曰陵者天生自然者也今王公墳壠稱陵春秋左傳曰南陵夏后臯之墓也春秋說題辭云邱者墓也冢者種也種墓也羅倚于山分卑尊之名者也故渠又東逕漢丞相周勃冢南冢北有弱夫冢故渠東南謂之周氏曲又東南逕漢景帝陵南又東南注于渭今無水渭水又東逕霸城縣北與

高陵分水水南有定陶恭王廟傅太后陵元帝崩傅昭儀隨王歸國稱定陶太后後十年恭王薨子代爲王徵爲太子太子卽帝位立恭王寢廟于京師比宣帝父悼皇故事元壽元年傅后崩合葬渭陵潘岳關中記漢帝后同塋則爲合葬不共陵也諸侯皆如之恭王廟在霸城西北廟西北卽傅太后陵不與元帝同塋渭陵非謂元帝陵也蓋在渭水之南故曰渭陵也陵與元帝齊者謂同十二丈也王莽奏毀傅太后冢冢崩壓殺數百人開棺梟聞數里公卿在位皆阿莽旨入錢帛遣子弟及諸生四夷凡十餘萬人操持作具助將作掘傅后冢二

旬皆平周棘其處以爲世戒今其處積土猶高世謂之增塹又亦謂之增阜俗亦謂之成帝初陵處所未詳也渭水又逕平阿侯王譚墓北冢次有碑左則涇水注之渭水又東逕鄠縣西蓋隴西郡之鄠徙也渭水又東得白渠枝口又東與五丈渠合水出雲陽縣石門山謂之清水東南流逕黃嶽山西又南入葭沱縣歷原南出謂之清水口東南流絕鄭渠又東南入高陵縣逕黃白城西本曲梁宮也南絕白渠屈而東流謂之曲梁水又東南逕高陵縣故城北東南絕白渠瀆又東南入萬年縣謂之五丈渠又逕蕩原東東南流注于渭渭水右逕新

豐縣故城北東與魚池水會水出麗山東北水本導源
東流後秦始皇葬于山北水過而曲行東注北轉始皇
造陵取土其地汙深水積成池謂之魚池池在秦皇陵
東北五里周圍四里池水西北流逕始皇冢北秦始皇
大興厚葬營建冢壙於麗戎之山一名藍田其陰多金
其陽多玉始皇貪其美名因而葬焉斬山鑿石下錮三
泉以銅爲槲旁行周迴三十餘里上畫天文星宿之象
下以水銀爲四瀆百川五嶽九州具地理之勢宮觀百
官奇器珍寶充滿其中令匠作機弩有所穿近輒射之
以人魚膏爲燈燭取其不滅者久之後宮無子者皆使

殉葬甚衆墳高五丈周迴五里餘作者七十萬人積年
方成而周章百萬之師已至其下乃使章邯領作者以
禦難弗能禁項羽入關發之以三十萬人三十日運物
不能窮關東盜賊銷槲取銅牧人尋羊燒之火延九十
日不能滅北對鴻門十里池水又西北流水之西南有
溫泉世以療疾三秦記曰麗山西北有溫水祭則得入
不祭則爛人肉俗云始皇與神女游而忤其旨神女唾
之生瘡始皇謝之神女爲出溫水後人因以澆洗創張
衡溫泉賦序云余出麗山觀溫泉浴神井嘉洪澤之普
施乃爲之賦云此湯也不使灼人形體矣池水又逕鴻

門西又逕新豐縣故城東故麗戎地也高祖王關中太
上皇思東歸故象舊里制茲新邑立城社樹粉榆令街
庭若一分置豐民以實茲邑故名之爲新豐也漢靈帝
建甯三年改爲都鄉封段熲爲侯國一清按漢承秦制
十里一亭十亭一
鄉都亭都鄉所以統一縣之鄉亭者後漢書本傳段
熲初封都鄉侯更封新豐縣侯非改新豐爲都鄉也後
立陰槃城其水際北城世謂是水爲陰槃水又北絕漕
渠注于渭渭水又東逕鴻門北舊大道北下坂口名也
古有鴻門亭漢書高祖將見項羽楚漢春秋曰項王在
鴻門亞父曰吾使人望沛公其氣衝天五色相繆或似
龍或似雲非人臣之相可誅之漢高祖會項羽范增目

羽羽不應樊噲杖盾撞人入食豕肩於此羽壯之郡國
志曰新豐縣東有鴻門亭者也郭緣生曰或云霸城南
門曰鴻門也項羽將因會危高祖羽仁而弗斷范增謀
而不納項伯終護高祖以獲免既抵霸上遂封漢王按
漢書注鴻門在新豐東十七里則霸上應百里按史記
項伯夜馳告張良良與俱見高祖仍使夜返考其道里
不容得爾今父老傳在霸城南門數十里於理爲得按
緣生此記雖歷覽史漢述行涂經見可謂學而不思矣
今新豐縣故城東三里有坂長二里餘塹原通道南北
洞開有同門狀謂之鴻門孟康言在新豐東十七里蓋

水經注釋 渭水下

指縣治而言非謂城也自新豐故城西至霸城五十里
霸城西十里則霸水西二十里則長安城應劭曰霸水
上地名在長安東三十里即霸城是也高祖舊停軍處
東去新豐既遠何由項伯夜與張良共見高祖乎推此
言之知緣生此記乖矣渭水又東石川水南注焉渭水
又東戲水注之水出麗山馮公谷東北流又北逕麗戎
城東春秋晉獻公五年伐之獲麗姬於是邑麗戎男國
也姬姓秦之麗邑矣又北右總三川逕鴻門東又北逕
戲亭東應劭曰戲宏農湖縣西界也地隔諸縣不得為
湖蘇林曰戲邑名在新豐東南三十里孟康曰乃水名

也今戲亭是也昔周幽王悅褒姒不笑王乃擊鼓舉
烽以徵諸侯至無寇褒姒乃笑王甚悅之及犬戎至王
又舉烽以徵諸侯諸侯不至遂敗幽王於戲水之上身
死於麗山之北故國語曰幽滅者也漢成帝建始二年
造延陵為初陵以為非吉于霸曲亭南更營之鴻嘉元
年于新豐戲鄉為昌陵縣以奉初陵永始元年詔以昌
陵卑下客土疎惡不可為萬歲居其罷陵作令吏民反
故徙將作大匠解延年一作清按漢書燉煌關中記曰昌
陵在霸城東二十里取土東山與粟同價所費巨萬積
年無成即此處也戲水又北分為二水並注渭水渭水

水經注釋 卷十九

水經注卷之六 渭水

又東冷水入焉水南出肺浮山

一清按長安志曰水經曰浮肺山一作肺浮是

舊本原作浮肺今本乃後人據他書更易耳蓋麗山連麓而異名也北會三

川統歸一壑歷陰槃新豐兩原之間北流注于渭渭水

又東首水南出倒虎山西總五水單流注逕秦步高宮

東世名市邱城歷新豐原東而北逕步壽宮西又北入

渭渭水又東得西陽水又東得東陽水並南出廣鄉原

北垂俱北入渭渭水又東逕下邳縣故城南秦伐邳置

邳戎於此有上邳故加下也渭水又東與竹水合南出

竹山北逕媚加谷歷廣鄉原東俗謂之大赤水北流注

于渭渭水又東得白渠口太始二年趙國中大夫白公

奏穿渠引涇水首起谷口出於鄭渠南名曰白渠民歌

之曰田于何所池陽谷口鄭國在前白渠起後即水所

始也東逕宜春城南又東南逕池陽城北枝瀆出焉東

南逕蕩原下逕鄠縣故城北東南入渭今無水白渠又

東枝渠出焉東南逕高陵縣故城北地理志曰左輔都

尉治王莽之千春也太康地記謂之曰高陸也車頻秦

書曰苻堅建元十二年高陸縣民穿井得龜大二尺六

寸背文負八卦古字堅以石為池養之十六年而死取

其骨以問吉凶名為客龜太卜佐高夢客龜言我將歸

江南不遇死于秦高於夢中自解曰龜三萬六千歲而

水經注卷之六 渭水

終終必亡國之徵也為謝元破於淮肥自益新城浮圖
 中秦祚因卽淪矣又東逕櫟陽城北史記秦獻公二年
 城櫟陽自雍徙居之十八年兩金于是處也項羽以封
 司馬欣為塞王按漢書高帝克關中始都之王莽之師
 亭也後漢建武二年封驃騎大將軍景丹為侯國丹讓
 世祖曰富貴不還故鄉如衣錦夜行故以封卿白渠又
 東逕秦孝公陵北又東南逕居陵城北蓮勺城南又東
 注金氏陂又東南注于渭故漢書溝洫志曰渠首起谷
 口尾入櫟陽是也今無水

又東過鄭縣北

渭水又東逕巒都城北故蕃邑殷契之所居世本曰契
 居蕃闕駟曰蕃在鄭西然則今巒城是矣俗名之赤城
 水曰赤水非也苻健入秦據此城以抗杜洪小赤水卽
 山海經之灌水也水出石脆之山北逕蕭加谷於孤柏
 原西東北流與禺水合水出英山北流與招水相得亂
 流西北注于灌灌水又北注于渭渭水又東西石橋水
 南出馬嶺山積石據其東麗山距其西源泉上通懸流
 數十與華岳同體其水北逕鄭城西水上有橋橋雖崩
 穢舊跡猶存東去鄭城十里故世以橋名水也而北流
 注于渭闕駟謂之新鄭水渭水又東逕鄭縣故城北史

記秦武公十一年縣之鄭桓公友之故邑也漢書薛瓚注言周自穆王已下都於新鄭不得以封桓公也幽王既敗號檜又滅遷居其地國于鄭父之邱是爲鄭桓公無封京兆之文余按史記考春秋國語世本言周宣王二十二年封庶弟友于鄭又春秋國語並言桓公爲周司徒以王室將亂謀于史伯而寄帑與賄于號檜之間幽王實于戲鄭桓公死之平王東遷鄭武公輔王室滅號檜而兼其土故周桓公言于王曰我周之東遷晉鄭是依乃遷封于彼左傳隱公十一年鄭伯使公孫獲曰吾先君新邑于此其能與許爭乎是其指新鄭爲言矣

然班固應劭鄭元皇甫謐裴頠王隱闕駟及諸述作者咸以西鄭爲友之始封也賢于薛瓚之單說也無宜違正經而從逸錄矣赤眉樊崇于鄭北設壇祀城陽景王而尊右校卒史劉俠卿牧牛兒盆子爲帝年十五被髮徒跣爲具絳單衣半頭赤幘直綦履顧見衆人拜恐畏欲號年建世後月餘乘白蓋小車與崇及尙書一人相隨向鄭北渡渭水卽此處也城南山北有五部神廟東南向華岳廟前有碑後漢光和四年鄭縣令河東裴畢字君先立

一清按五部神廟碑洪氏适隸釋作殺阬諸侯闕事其細闕祭法曰山林川谷有益於民羈二在祀典夫中條之山者蓋華嶽之體也石隄樹谷南通商

當是石為隄有木為谷後人因以名其神碑云前世
史王翦將軍之像莫可曉今碑云石隄樹谷五樓先生東臺御
廟歐陽公嘗託部使者模此碑命工以麴填其刻而鑄
以疏泄澗注而無溢溢之患自魏晉以來謂之五部神
陵古稱地險蓋川阜高深雨盛水集有隄以儲之則可
令裴畢字君先立碑無縣令姓名據水經得之殺有
右毅阮君神祠之碑銘篆額在鄭縣靈帝光和四年
饗後之人是遵是奉神必據焉光和大小有差殺阮君尚
稷其有微拜州郡辟召皆當來辭大小有差殺阮君尚
殺阮通利其水紹修舊祀宏祐其祠使民報祈視於社
之陵遲懼關至之無備追惟伯禹遐治之利乃復浚治
時序肅恭明神敬奉禮祀勤郵民隱而除其害愍一縣
民怨廢阮稍堙塞隄防沮潰漂沒田疇滯敗亭市神怒
祀大夫將軍牧伯故為立祠以報其功自新已來其
注諸涓涓灑灑暴使不為害前世通利吏民興貴有御
乘高趨下揚波跳沫於殺阮以為之黃承寫其流北
辭以屬熊耳百川鍾集充崖滿谷時有盛雨彭瀾涌溢
乘高趨下揚波跳沫於殺阮以為之黃承寫其流北

通利吏民興貴有御史大夫將軍牧伯故為立祠考其
文意蓋謂前世阮不堙塞水泉通利地產人物有至御
史將軍牧伯之貴者後人不考亦以名其神爾光和之
四年龍集辛酉此碑以作噩為作詒者出西漢天文志
碑以彭為彭彭即阮字詒即拓字金石錄跋尾曰裴君
水經以為名畢而集古錄云名暉今詳其點畫頗近畢
字疑集古錄誤又歐陽棐集古錄目及宋不知作者天
下碑錄俱作裴暉字君光字亦誤當以酈注先字為
正渭水又與東石橋水會故沈水也水南出馬嶺山北
流逕武平城東按地理志左馮翊有武城縣王莽之桓
城也石橋水又逕鄭城東水有故石梁述征記曰鄭城
東西十四里各有石梁者也又北逕沈城北漢書地理
志左馮翊有沈陽縣王莽更之曰制昌也蓋藉水以取
稱矣渭水又東敷水注之水南出石山之敷谷北逕告

平城東耆舊所傳言武王伐紂告太平於此故城得厥名非所詳也敷水又北逕集靈宮西地理志曰華陰縣有集靈宮武帝起故張昶華嶽碑稱漢武慕其靈築宮在其後而北流注于渭渭水又東糧餘水注之水南出糧餘山之陰北流入于渭俗謂之宣水也渭水又東合黃酸之水世名之為于渠水水南出升山北流注于渭渭水又東逕平舒城北城側枕渭濱半破淪水南面通衢昔秦始皇之將亡也江神素車白馬道華山下返璧于華陰平舒道曰為遺鎬池君使者致之乃二十八年渡江所沈璧也即江神返璧處也渭水之陽即襄德縣

界也城在渭水之北沙苑之南即襄德縣故城也世謂之高陽城非矣地理志曰禹貢北條荆山在南山下有荆渠即夏后鑄九鼎處也王莽更縣曰德驩渭水又東逕長城北長澗水注之水南出太華之山側長城東而北流注于渭水史記秦孝公元年楚魏與秦接界魏築長城自鄭濱洛者也

又東過華陰縣北

渭水東南洛水入焉闕駟以為漆沮之水焉曹瞞傳曰操與馬超隔渭水每渡渭輒為超騎所衝突地多沙不可築城婁子伯說今寒可起沙為城以水灌之一宿而

成操乃多作縑囊以堙水夜汲作城立于是水之次也
渭水逕華陰縣故城北春秋之陰晉也秦惠文王五年
改曰甯秦漢高帝八年更名華陰王莽之華壇也縣有
華山山海經曰其高五千仞削成而四方遠而望之又
若華狀西南有小華山也韓子曰秦昭王令工施鉤梯
上華山以節柏之心爲博箭長八尺棋長八寸而勒之
曰昭王嘗與天神博于是神仙傳曰中山衛叔卿嘗乘
雲車駕白鹿見漢武帝帝將臣之叔卿不言而去武帝
悔求得其子度世令追其父度世登華山見父與數人
博于石上勅度世令還山層雲秀故能懷靈抱異耳山

渭水下

三

八〇二

上有二泉東西分流至若山雨滂湃洪津泛灑挂溜騰
虛直瀉山下有漢魏文帝二廟一清按詳下文只是漢文帝廟耳魏字羨文也
太平寰宇記華陰縣有南北二廟北廟有古碑九所其一
是漢鎮遠將軍段熲更修之碑黃門侍郎張景書魏
文帝與鍾繇各于碑陰刻二十字此碑垂名海內南廟
是華北君祠今有北君靈臺上仙下仙四神童院此即
所謂二廟也但以南廟爲華北君祠而北廟又廟有石
不云是漢文帝祠不可臆解或是文有脫誤耳
闕數碑一碑是建安中立漢鎮遠將軍段熲更修祠堂
碑文漢給事黃門侍郎張景造景自書之魏文帝又刊
其碑陰二十餘字二書有重名垂于海內又刊侍中司
隸校尉鍾繇宏農太守母邱儉姓名廣六行鬱然循平
是太康八年宏農太守河東衛叔始爲華陰令河東裴

水經注卷十九

三

仲恂役其逸力修立壇廟夾道樹柏迄于山陰事見永

興元年華百石所造碑一清按隸釋華山有碑一西

嶽華山亭碑靈帝光和二年一樊毅修華嶽碑光二年俱云水

民租碑光和本無是四年碑蓋失矣西嶽碑洪氏云在華陰

縣威宗延熹四年袁逢守宏農郡以華嶽舊碑文磨滅

遂案經傳載原本勒斯石以垂後會遷京兆乃勅都水

掾杜遷市石遣書佐郎郭香察書碑成于後之二名郭香

孫瑒典郡時也又曰東漢循王莽之禁人無二名郭香

察書者察涖他入之書耳小歐陽以爲郭香察所書非

也隸辨云額題云西嶽華山廟碑六篆字爲二行碑式

云文二十二行行三十七字袁府君肅恭明神及京兆

尹勅杜遷市石皆平闕高祖太宗孝武並列行高出一

字有紋如碁局碑云勅都水掾杜遷市石遣書佐郎郭

香察書蓋一人其石一人察其書律歷志有太史郎郭

歷郎中郭香豈其人與金石錄跋尾曰孝武皇帝修封

禪之禮巡省五嶽立宮其下宮曰集靈宮殿曰存仙殿

門曰望仙門歐陽公集古錄云所謂集靈宮者他書不

見惟見此碑耳余按班固漢書地理志華陰有集靈宮

武帝起而酈道元注水經亦云數水北逕集靈宮引地

理志所載其語皆同然則不獨見于此碑矣而所謂存

仙殿望仙門者諸書不載都氏穆金薤琳琅曰漢西嶽

華山碑董氏書跋云集靈宮漢志既圖書之桓譚嘗賦之

張景序曰世宗經集靈宮三輔黃圖書其制度藝文

類聚亦書其名則又金石錄之所未及者華山亭碑樊

毅所立隸釋所謂華嶽有樊毅之碑三者也碑云毅字

仲德集古錄集古錄目金石錄華嶽釋俱不著碑所在蓋

亦在華山之上也復租碑及修華嶽碑集古錄目云在

華州隸釋云復租碑全載光和二年前二月壬午奏牘

無他詞修嶽碑云有漢元舅五侯之胄謝陽之孫按范

書樊宏封壽張侯樊丹射陽侯樊尋元都侯樊忠更父

侯樊茂平望侯樊氏侯者五國毅即丹之後也又金石

錄目有西嶽太守常山元氏張勳爲西嶽華山作石闕

高二丈二尺永和漢順帝晉穆帝姚泓皆有此號穆帝

渭水又東沙渠水注之水

出南山北流西北入長安城城自華山北經于河華嶽
銘曰秦晉爭其祠立城建其左者也郭著述征記指證
魏之立長城長城在後不得言在斯斯為非矣渠水又
北注入渭渭水又東逕定城北西征記曰城因原立述
征記曰定城去潼關三十里夾道各一城渭水又東泥
泉水注之水出南山靈谷而北流注于渭水也渭水又
東合沙渠水水即符禹之水也南出符禹之山北流注
于渭

又東入于河

春秋之渭汭也左傳閔公二年虢公敗犬戎于渭隊服

虔曰隊謂汭也杜預曰水之隈曲曰汭王肅云汭入也

呂忱曰汭者水相入也水會即船司空所在矣地理志

曰渭水東至船司空入河服虔曰縣名都官全氏曰二
字疑有訛

誤三輔黃圖有船庫官後改為縣王莽之船利者也

補豐水

宋敏求長安志長安縣下引水經注曰豐水出豐溪西
北流分為二水一水東北流又北交水自東入焉又北
昆明池水注之又北逕靈臺西又北至石塢注于渭萬
年縣下云福水即交水也水經注曰水承樊川御宿諸
水出縣南山石壁谷南三十里與真谷水合亦名子午

谷水長安縣下引水經注曰交水又西南流與豐水支
津合其北又有漢故渠出焉又西至石塢分爲二水一
水西流注豐水一水自石塢北逕細柳諸原北流入昆
明池又石闕堰下引水經注云交水西至石塢漢武帝
元狩三年穿昆明池所造一清按漢書地理志右扶風
鄠縣豐水出東南北過上林苑入渭宋氏所引水經注
今本失之而豐水源流較班志尤詳也禹貢雖指曰先
儒皆云豐涇大川故曰會漆沮小水故曰過嘗考渭南
本周之舊都西漢因之其後隋唐復建都于此歷代相
承鑿引諸川以資汲取便轉輸溉民田灌苑囿津渠交

絡離合不常凡地志水經所言類非禹迹之舊詩曰豐
水東注維禹之績則渭南諸川唯豐爲大自漢鴻嘉中
王商穿長安城引內豐水注第中而其流漸微逮唐貞
觀中堰豐鎬入昆明池二水於是斷流又於京城西北
引豐水爲漕渠合鎬水北流由禁苑入渭而豐水之流
愈微矣竊疑豐西之澇豐東之鎬涵霸澆禹時悉合豐
以入渭故豐得成其大且詩言東注而漢志言北過上
林苑入渭則是北流而非東注矣按豐水入昆明池不
始於唐東樵云云由未見水經注逸文故也

補涇水

禹貢錐指曰周禮雍州其川涇汭水經無涇水之目渭水篇中於入渭處僅附見一語而寰宇記原州平高縣笄頭山一名崆峒山下引水經注云蓋大隴山之異名莊子謂黃帝學道于廣成子蓋在此山百泉縣涇水下引水經云涇水出安定涇陽縣高山注云山海經曰高山涇水出焉東流注于渭入關謂之八水彈箏峽下引水經注云涇水逕都盧山山路之內常有如彈箏之聲行之聞之鼓舞而去又云弦歌之山峽口水流風吹滴崖響如彈箏之韻因名涇州靈臺縣蒲川水下引水經注云蒲川水出南山蒲谷東北合細川水又東北合且

氏川水邠州宜祿縣芹川下引水經注云出羅川縣千子山山一名千子嶺東流逕宜祿縣北甯州真甯縣大陵水下引水經注云大陵小陵水出巡河南殊川西南逕甯陽城故幽詩曰夾其皇澗陵水即皇澗乾州永壽縣高泉下引水經注云甘泉山即高泉山也耀州雲陽縣涇水下引水經注云涇水東流歷峽謂之涇峽五龍谷泉下引水經注云五龍水出雲陽宮西南雍州醴泉縣谷口城下引水經注云九嶼山東伸山西謂之谷口本文是九嶼山東連伸山西當涇水處故謂之谷口即寒門也此皆言涇水而今本無之是水經元有涇水篇

宋初尚存後乃亡之耳一清按寰宇記渭州潘源縣下引水經注云良源縣有銅城山水出厯白石城隴州吳山縣下引水經注云南由縣有白環水出白環谷二條皆涇水注文而東樵失引之又漢書地理志安定郡烏氏縣都盧山在西師古曰氏音支九域志曰都盧峽卽彈箏峽又文選北征賦登赤須之長坂入義渠之舊城李善注云赤須阪在北地郡水經注赤須水出赤須谷西南流注羅水寰宇記曰眞甯縣羅川水出羅山甯州古公劉邑春秋爲義渠戎國有義渠城卽漢書地理志北地郡義渠道也又初學記引水經注曰梁谷水西南

注于涇又曰涇水逕望夷宮北臨涇水以望北夷秦二世將祠涇沈四白馬於涇齋於此宮內又曰涇水逕長平觀北甘露三年呼韓邪單于入朝上登長平觀詔單于無謁卽是觀也又長安志醴泉縣下引水經注曰涇水導源安定朝那縣西笄頭山秦始皇巡地西出笄頭山卽是山也蓋大隴之異名又名勝志邠州淳化縣下引水經注云五龍水泉流逕長箱坂下方輿紀要云車箱坂水經謂之長箱坂諸所引文又在寰宇記之外雖指又曰元和志云漆水在新平縣西九里北流注于涇寰宇記云注水經曰漆水自宜祿界來又東過漆縣北

今縣西九里有白土川東北流逕白土原東陳陽原西
又東北流注涇水此條亦是涇水篇逸文故不見於漆
水注中也又漢志鹵縣濯水出西此則未知所在矣

補
芮水

太平寰宇記隴州汧源縣下引水經注云芮水出小隴
山其川名汧邠州宜祿縣芮水下引水經注云芮水又
東逕宜祿川俗謂之宜祿川水通典引水經云汧水逕
宜祿川俗曰宜祿水方輿紀要云芮水出鳳翔府隴州
西四十里弦蒲藪東北流入平涼府華亭縣南又東逕
崇信縣北至涇州城北又東南過長武縣北而東流合

于涇水禹貢錐指曰涇屬渭汧傳曰水北曰汧春秋傳
注曰水之隈曲曰汧說文汧水相入也按二義適相成
而不相悖蓋兩水相入其水會襟帶處必有隈曲詩大
雅芮鞠之卽芮卽職方涇汧之汧水名也漢志扶風汧
縣下云芮水出西北東入涇詩芮隄雍州川也師古曰
隄讀與鞠同余因悟水北曰汧之義蓋涇水東南流至
邠州長武縣東芮水自平涼府靈臺縣界流逕縣南而
東注于涇公劉所居故豳城正在二水相會內曲之處
及其後人衆而地不能容則又營其外曲以居故曰止
旅迺密芮鞠之卽鄭箋曰水之內曰隄水之外曰鞠外

水經注釋卷十九終
即南內即北也一清按涇汭各源汭流稍短不若涇耳
職方以二水為雍州川水經宜列于篇目故採擷羣書
以補逸文

水經注釋卷十九終

海甯錢保塘
華陽吳祖椿
覆校

水經注釋卷二十

仁和趙一清誠夫錄

漾水

丹水

漾水出隴西氐道縣嶓冢山東至武都沮縣為漢水

常璩華陽國志曰漢水有二源東源出武都氐道縣漾山為漾水禹貢導源東流為漢是也西源出隴西西縣嶓冢山會白水逕葭萌入漢始源曰沔按沔水出東狼谷逕沮縣入漢漢中記曰嶓冢以東水皆東流嶓冢以西水皆西流即其地勢源流所歸故俗以嶓冢為分水嶺即此推沔水無西入之理劉澄之云有水從河陽縣

水經注釋

漾水

一清按漢書高帝紀師古曰阿陽天水之縣也今流俗書本或作河陽者非也章懷後漢書注亦云然則寫阿陽為河陽其來舊矣

南至梓潼漢壽入大穴暗通罽山郭景純亦言是矣罽山穴小本不容水水成大澤而流與漢合庾仲雍又言漢水自武遂川南入蔓葛谷越野牛逕至開城合西漢水故諸言漢者多言西漢水至葭萌入漢又曰始源曰沔是以經言漾水出氐道縣東至沮縣為漢水東南至廣魏白水診其泂注似與三說相符而未極西漢之源矣然東西兩川俱受沔漢之名者義或在茲矣班固地理志司馬彪袁山松郡國志竝言漢有二源東出氐道西出西縣之蟠冢山關駟云漢或為漾漾水

出崑崙西北隅至氐道重源顯發而為漾水又言隴西西縣蟠冢山在西西漢水所出南入廣魏白水又云漾水出獾道東至武都入漢許慎呂忱竝言漾水出隴西獾道東至武都為漢水不言氐道然獾道在冀之西北又隔諸川無水南入疑出獾道之為謬矣又云漢漾也東為滄浪水山海經曰蟠冢之山漢水出焉而東南流注于沔然東西兩川俱出蟠冢而同為漢水者也孔安國曰泉始出為漾其猶濛耳而常璩專為漾山漾水當是作者附而為山水之殊目矣余按山海經漾水出崑崙西北隅而南流注于醜塗之水穆天子傳曰天子自

春山西征至于赤烏氏己卯北征庚辰濟于洋水辛巳入于曹奴曹奴之人戲觴天子于洋水之上乃獻良馬九百牛羊七千天子使逢固受之天子乃賜之黃金之鹿戲乃膜拜而受余以太和中從高祖北巡狄人猶有此獻雖古今世殊而所貢不異然川流隱伏卒難詳照地理潛閎變通無方復不可全言闕氏之非也何氏曰洋音詳不可竟指為漾以證闕駟之說雖津流派別枝渠勢懸原始要終潛流或一故俱受漢漾之名納方土之稱是其有漢川漢陽廣漢漢壽之號或因其始或據其終縱異名互見猶為漢漾矣川其目殊或亦在斯今西縣嶓冢山西漢

水所導也然微涓細注若通羣厯津注而已西流與馬池水合水出上邽西南六十餘里謂之龍淵水言神馬出水事同涂吾來淵之異故因名焉開山圖曰隴西神馬山有淵池龍馬所生即是水也其水西流謂之馬池川又西流入西漢水西漢水又西南流左得蘭渠溪水次西有山黎谷水次西有鐵谷水次西有石耽谷水次西有南谷水竝出南山揚湍北注又得高望谷水次西得西溪水次西得黃花谷水咸出北山飛波南入西漢水又西南資水注之水北出資川導源四壑南至資峽總為一水出峽西南流注西漢水西漢水又西南得峽

石水口水出苑亭西草黑谷三溪西南至峽石口合爲一瀆東南流屈而南注西漢水西漢水又西南合楊廉川水水出西谷衆川瀉流合成一川東南流逕西縣故城北秦莊公伐西戎破之周宣王與其大駱犬邱之地爲西垂大夫亦西垂宮也王莽之西治矣建武八年世祖至河陽竇融等悉會天水震動隗囂將妻子奔西城從楊廣廣死囂愁窮城守時潁川賊起車駕東歸畱吳漢岑彭圍囂岑等壅西谷水以縑幔盛土爲隄灌城城未沒丈餘水穿壅不行地中數丈涌出故城不壞王元請蜀救至漢等退還上邽但廣廉字相狀後人因以人

名名之故習譌爲楊廉也置楊廉縣焉又東南流右會茅川水水出西南戎溪東北流逕戎邱城南吳漢之圍西城王捷登城向漢軍曰爲隗王城守者皆必死無二心願諸將亟罷請自殺以明之遂刎頸而死又東北流注西谷水亂流東南入于西漢水西漢水又西南逕始昌峽直始昌縣故城西晉書地道記曰天水始昌縣故西城也亦曰清崖峽西漢水又西南逕宕備戍南左則宕備水自東南西北注之右則鹽官水南入焉水北有鹽官在蟠冢西五十許里相承營煮不輟味與海鹽同故地理志云西縣有鹽官是也其水東南逕宕備戍西

東南入漢水漢水又西南合左谷水水出南山窮溪北注漢水又西南蘭臯水出于西北五交谷東南歷祁山軍東南入漢水漢水又西南逕祁山軍南雞水南出雞谷北逕水南縣西北流注于漢漢水又西建安川水入焉其水導源建威西北山白石戍東南二源合注東逕建威城南又東與蘭坑水會水出西南近溪東北逕蘭坑城西東北流注建安水建安水又東逕蘭坑城北建安城南其地故西縣之歷城也楊定自隴右徙治歷城卽此處也去仇池一百二十里後改爲建安城其水又東合錯水水出錯水戍東南而東北入建安水建安水

又東北有雉尾谷水又東北有太谷水又北有小祁山水竝出東溪揚波西注又北左會胡谷水水西出胡谷東逕金盤歷城二軍北軍在水南層山上其水又東注建安水建安水又東北逕塞峽元嘉十九年宋太祖遣龍驤將軍裴方明伐楊難當難當將妻子北奔安西參軍魯尙期追出塞峽卽是峽矣左山側有石穴洞人言潛通下辨所未詳也其水出峽西北流注漢水漢水北連山秀舉羅峯競峙祁山在嶓冢之西七十許里山上有城極爲巖固昔諸葛亮攻祁山卽斯城也漢水逕其南城南三里有亮故壘壘之左右猶豐茂宿草蓋亮所

水經注卷之二十一 漢水
植也在上邽西南二百四十里開山圖曰漢陽西南有
祁山蹊徑逶迤山高巖嶮九州之名岨天下之奇峻今
此山於衆阜之中亦非爲傑矣漢水又西南與甲谷水
合水出西南甲谷東北流注漢水漢水又西逕南岨北
岨之中上下有二城相對左右墳隴低昂亘山被阜古
語云南岨北岨萬有餘家諸葛亮表言祁山去沮縣五
百里有民萬戶矚其邱墟信爲殷矣漢水西南逕武植
戍南武植戍水發北山二源奇發合于安民戍南又南
逕武植戍西而西南流注于漢水漢水又西南逕平夷
戍南又西南夷水注之水出北山南逕其戍西南入漢

水漢水又西逕蘭倉城南又南右會兩溪俱出西山東
流注于漢水張華博物志云溫水出烏鼠山下注漢水
疑是此水而非所詳也漢水又南入嘉陵道而爲嘉陵
水世俗名之爲階陵水非也漢水又東南得北谷水又
東南得武階水又東南得倉谷水右三水竝出西溪東
流注漢水漢水又東南逕瞿堆西又屈逕瞿堆南絕壁
峭峙孤嶮雲高望之形若覆壺其高二十餘里羊腸蟠
道三十六迴開山圖謂之仇夷所謂積石嵯峨嶽岑隱
阿者也上有平田百頃煮土成鹽因以百頃爲號山上
豐水泉所謂清泉湧沸潤氣上流者也漢武帝元鼎六

年開以為武都郡天池大澤在西故以都為目矣王莽
 更名樂平郡縣曰循虜常璩范曄云郡居河池一名仇
 池池方百頃即指此也左右悉白馬氏矣漢獻帝建安
 中有天水氏楊騰者世居隴右為氏太師子駒勇健多
 計徙居仇池魏拜為百頃氏王漢水又東合洛谷水水
 有二源同注一壑於神蛇成西左右山溪多五色蛇性
 馴良不為物毒洛谷水又南逕虎膺成東又南逕仇池
 郡西瞿堆東西南入漢水漢水又東合洛漢水水北發
 洛谷南逕威武成南又西南與龍門水合水出西北龍
 門谷東流與橫水會東北窮溪即水源也又南逕龍門

成東又東南入洛漢水又東南逕上祿縣故城西修源
 濬導逕引北溪南總兩川單流納漢漢水又東南逕濁
 水城南又東南會平洛水水出武階東北四十五里更
 馳南溪導源東北流山側有甘泉涌波飛清下注平洛
 水又逕甘泉成南又東逕平洛成南一清按漢志武都
 郡有平樂道即平
 道南與修水合水總二源東北合漢漢水又東南於槃
 頭郡南與濁水合水出濁城北東流與丁令溪水會其
 水北出丁令谷南逕武街城西東南入濁水濁水又東
 逕武街城南故下辨縣治也李倉李稚以氏王楊敞堅

妻死葬陰平襲武街為氏所殺於此矣一清按華陽國志十六國春秋
李倉作李玲又氏王楊敵堅蓋誤文也今廣業郡治濁水
又東宏休水注之水北出溪南逕武街城東而南流注
於濁水濁水又東逕白石縣南續漢書曰虞詡為武都
太守下辨東三十餘里有峽峽中有泉生大石障塞水
流春夏輒潰溢敗壞城郭詡使燒石以醋灌之石皆碎
裂因鑄去焉遂無泛溢之害濁水即白水之異名也濁
水又東南渥陽水北出渥谷南逕白石縣東而南入濁
水濁水又東南與仇鳩水合水發鳩溪南逕河池縣故
城西王莽之樂平亭也其水西南流注濁水濁水又東

南與河池水合水出河池北谷南逕河池成東西南入
濁水濁水東南兩當水注之水出陳倉縣之大散嶺西
南流入故道川謂之故道水西南逕故道城東魏征仇
池築以置戍與馬鞍山水合水東出馬鞍山厯谷西流
至故道城東西入故道水西南流北川水注之水出北
洛櫛山南南流逕唐倉城下南至困豕川入故道水故
道水又西南厯廣香交合廣香川水水出南田縣利喬
山一清按郡國志劉昭補注引秦州記曰上邽縣北有
利山川中平地有土堆高五丈生細竹翠茂殊常二
楊樹大數十圍百姓祀之朱氏南流至廣香川謂之廣
謀璋箋曰利一作穆未知所據
香川水一清按蕭齊建元元年葭萌戍主楊廣又南注
香請降以為沙州刺史川蓋以人得名

故道水謂之廣香交故道水又西南入秦岡山尙婆水

注之山高入雲遠望增狀若嶺紆曦軒峯枉月駕矣懸

崖之側列壁之上有神象若圖指狀婦人之容其形上

赤下白世名之曰聖女神至於福應愆違方俗是祈水

源北出利喬山南逕尙婆川謂之尙婆水一清按元和

婆水本名石磬水水多磐石因歷兩當縣之尙婆城南

以為名俗語音訛故云尙婆魏故道郡治也西南至秦岡山入故道水故道水又右

合黃盧山水水出西北天水郡黃盧山腹歷谷南流交

注故道水故道水南入東益州之廣業郡界與沮水枝

津合謂之兩當溪水上承武都沮縣之沮水濱西南流

注於兩當溪虞詡為郡漕穀布在沮從沮縣至下辨山

道嶮絕水中多石舟車不通驢馬負運僦五致一詡乃

於沮受僦直約自致之即將吏民按行皆燒石櫛木開

漕船道水運通利歲省萬計以其僦廩與吏士年四十

餘萬也又西南注于濁水濁水南逕槃頭郡東而南合

鳳溪水水上承濁水於廣業郡南逕鳳溪中有二石雙

高其形若闕漢世有鳳凰止焉故謂之鳳凰臺北去郡

三里水出臺下東南流左注濁水濁水又南注漢水漢

水又東南歷漢曲逕挾崖與挾崖水合水西出擔潭交

東流入漢水漢水又東逕武興城南又東南與北谷水

合水出武興東北而西南逕武興城北謂之北谷水南
轉逕其城東而南與一水合水出東溪西流注北谷水
又南流注漢水漢水又西南逕關城北除水出西北除
溪東南流入于漢漢水又西南逕通谷通谷水出東北
通溪上承漾水西南流為西漢水漢水又西南寒水注
之水東出寒川西流入漢漢又西逕水石亭成廣平水
西出百頃川東南流注漢又有平阿水出東山西流注
漢水漢水又逕晉壽城西而南合漢壽水水源出東山
西逕東晉壽故城南而西南入于漢水也
又東南至廣魏一作廣魏胡氏曰廣魏者故廣漢也蓋曹氏

改名漢後人續經此其一證何氏曰亭林云魏書崔浩傳
浩正書人多託寫急就章必稱馮代疆以示不敢犯國史
于馮代疆下注曰疑按急就篇有馮漢疆魏初國號曰代
故改漢疆為代疆酈道元以廣漢為廣魏即此例也據此
則非由曹氏改名是又一義也白水縣西又東南至葭萌縣東北與羌水
合

白水西北出於臨洮縣西南西傾山一清按漢志廣漢郡甸氏道白水出
徽外東至葭萌入漢過郡一行九百五十里水色白濁東南流與黑水合水
出羌中西南逕黑水城西又西南入白水白水又東逕
洛和城南洛和水西南出和溪東北流逕南黑水城西
而北注白水白水又東南逕鄧至城南又東南與大夷
祝水合水出夷祝城西南而窮溪北注夷水又東北合

羊洪水出東南羊溪西北逕夷祝城東又西北流屈而
 東北注于夷水夷水又東北入白水白水又東與安昌
 水會水源發衛大西溪東南逕鄧至安昌郡南又東南
 合無累水無累水出東北近溪西南入安昌水安昌水
 又東南入白水白水又東南入陰平得東維水水出西
 北維谷東南逕維城西東南入白水白水又東南逕陰
 平道故城南王莽更名摧虜矣即廣漢之北部也廣漢
 屬國都尉治漢安帝永初三年分廣漢蠻夷置有白馬
 水出長松縣西南白馬溪東北逕長松縣北一清按陶書地理志
武都郡長松縣西魏置初曰建昌開皇十八年改曰而
長松此昔人所謂未必不間及隋唐者也吁可怪已

東北注白水白水又東逕陰平大城北蓋其渠帥自故
 城徙居也白水又東偃溪水出西南偃溪東北流逕偃
 城西而東北流入白水白水又東逕偃城北又東北逕
 橋頭昔姜維之將還蜀也雒州刺史諸葛緒邀之於此
 後期不及故維得保劍閣而鍾會不能入也白水又與
 羌水合自下羌水又得其通稱矣白水又東逕郭公城
 南昔郭淮之攻廖化于陰平也築之故因名焉白水又
 東離川水出西南離溪東北注白水白水又東合空冷
 水傍溪西南窮谷即川源也白水又東南與南五部水
 會水有二源西源出五部溪東南流東源出郎谷西南

合注白水白水又東南逕建陽郡東

一清按兩漢晉宋後魏地志俱無建

陽郡之名勝志引此文作建昌郡則西魏析陰平所置也以地望而言宇文會置建昌縣後改曰長松建昌疑卽上長松之舊稱然皆在孝昌以後道元何由得舉之乎或曰此後魏梁州之華陽郡也建陽疑華陽之譌未詳而非北與一水合二源同注共成一溪西南流入於

白水白水又東南逕白水縣故城東卽白水郡治也經云漢水出其西非也白水又東南與西谷水相得水出西溪東流逕白水城南東南入白水白水又南左會東流水東入極溪卽水源也白水又南逕武興城東又東南左得刺稽水口溪東北出便水源矣白水又東南清水左注之庾仲雖曰清水自祁山東合白水斯爲孟浪

也水出於平武郡東北

一清按隋書地理志云平武郡西魏置

矚累互下

南逕平武城東屈逕其城南又西歷平洛郡東南屈而南逕南陽僑郡東北又東南逕新巴縣東北又東南逕始平僑郡南又東南逕小劍戍北西去大劍三十里連

山絕嶮飛閣通衢故謂之劍閣也張載銘曰一人守嶮萬夫趲趲信然故李特至劍閣而歎曰劉氏有如此地面而縛於人豈不奴才也小劍水西南出劍谷東北流逕其戍下入清水清水又東南注白水白水又東南逕吐費城南卽西晉壽之東北也東南流注漢水西晉壽卽蜀王弟葭萌所封爲苴侯邑故遂名城爲葭萌矣劉

備改曰漢壽太康中又曰晉壽水有津關

一清按通鑑注引水經注

云白水東南流至葭萌縣謂之葭萌水段元章善風角

水有津關所謂白水關今本似有脫文弟子歸元章封筒藥授之曰路有急難開之生到葭萌

從者與津吏爭打傷開筒得書言其破頭者可以此藥

裹之生乃歎服還卒業焉亦廉叔度抱父柩自沈處也

又東南過巴郡閬中縣

巴西郡治也劉璋之分三巴此其一焉闕駟曰强水出

陰平西北强山一曰强川姜維之還也鄧艾遣天水太

守王頌敗之于强川卽是水也其水東北逕武都陰平

梓潼南安入漢水漢水又東南逕津渠戍東又南逕閬

中縣東閬水出閬陽縣而東逕其縣南又東注漢水昔

劉璋之攻霍峻于葭萌也自此水上張達范疆害張飛

於此縣漢水又東南得東水口水出巴嶺南歷獠中謂

之東游水李壽之時獠自牂柯北入所在諸部布滿山

谷其水西南逕宋熙郡東又東南逕始平城東又東南

逕巴西郡東又東入漢水漢水又東與濩溪水合水出

獠中世亦謂之爲清水也東南流注漢水漢水又東南

逕宕渠縣東又東南合宕渠水西北出南鄭縣巴嶺與

槃余水同源派注南流謂之北水東南流與難江水合

水出東北巴山

一清按寰宇記集州難江縣引此注作小巴山云小巴嶺在縣東

西南

注之又東南流逕宕渠縣謂之宕渠水又東南入于漢

又東南入漢州江津縣東南入于江

胡肅明曰水經魏晉人續成自後間有附益亦未必不及
隋唐頃讀至漾水末有漢州江津縣今屬重慶府本州治巴
筆平漢乃渝字之訛渝州江津縣今屬重慶府本州治巴
縣地西魏分置江陽縣隋改曰江津巴縣在東江津在西
漢水不得過江津也再三推尋不知其故及讀至羌水篇
云出羌中東有至廣魏白水縣與漢水合又東南至巴郡
閬中縣又南至墊江東南入于江憬然悟曰羌水合白水
東南至白水縣與漢水合蓋漢水入江之道即羌水入江
之道自閬中以下經文與此字字相同今本之誤蓋由東
南入于江之上字有經文與此字字相同今本之誤蓋由東
墊江今合州漢水流逕州東涪水自州西南來注之正酈
氏所云涪水注之庾仲雍所謂涪內水者也若作渝州江
津縣則涪漢之合遠在上流經注齟齬矣東南入漢州江
津七字豈改作南至墊江四字入字尤非水經敘次水所
逕過之東填寫非魏晉以後續經真卓識也東樵既面與論
庸人

涪水注之庾仲雍所謂涪內水者也

證及作錐指據漢書地理志隴西西縣下云禹貢嶓冢山
西漢水所出南入廣魏白水東南入于江而不從閬說江州更定
俱屬巴郡第江州縣東南入于江則隋置耳且漢州唐垂拱
二年始立此名明是學至者妄為填寫邱乃改作渝州
以實其為隋唐人筆何至曲為之說如此耶江水篇云
又東北至巴郡江州縣東樵水涪水漢水白水宕渠水五
水合南流注之足相證明東樵以班志為據較疏證似長
分水經又有漾河異篇之目後之言禹貢者山川迤無
定位莫能折衷黃文叔尚書說曰漢有沔之入廣漢白
漢水也地理志西漢水出西縣嶓冢山南入廣漢白
蓋潛漢也經不著其所出自古皆以為東西兩漢俱出
嶓冢則或然矣而西漢固無沔之名漢志漾水出隴
西氏道至武都為漢武都東漢水受氏道水不通川渠阻隔
則沔道俱為東漢也獨武都東漢水受氏道水不通川渠阻隔
武都受漾為東漢也獨武都東漢水受氏道水不通川渠阻隔
源由是愈紛錯不可據而桑欽遂徙氏道漾水為西漢之
之以難驗之論更覺齟齬故當盡廢諸說而一之以經

水經注釋卷二十

齒

文杜佑通典秦州上邦縣蟠冢山西漢水所出經嘉陵
日嘉陵江經閬中曰閬中江漢中金牛縣蟠冢山禹貢
漾水至此為漢水亦曰沔水其說為可據常璩華陽國
志漾水出漾山推為沔水之源是漢水所出異源所
東狼谷中水經推為沔水之源是漢水所出異源所
不同矣胡身之通鑑注云據禹貢則漢水所出異源
經則漾會于涪沔入於江所出異源所出異源所出
則漾出氏道至武都為漢水而東漢受氏道水通謂
沔過江夏而入于江則漾沔似合為一矣然又言沮水
出沮縣南至沙羨入江與水經所謂沔水即沮水說似
不合而實合也夫道入江與水經所謂沔水即沮水
蟠冢有二東西兩漢異源同流是豈竟無別白耶若
泰之禹貢論力排水經反覆于東出西南其向曉不
置近世胡肱明作禹貢雖指首列導漾圖又作東西二
源圖可謂詳且備矣然不能于班志原文一加審諦即
道元之注亦未之深察故立言之旨猶有所蔽今略舉
其書曰按後魏地形志華陽郡蟠冢縣有蟠冢山漢水
出焉唐六典山南道名山曰蟠冢縣有蟠冢山漢水
西漢中府沔縣山南道名山曰蟠冢縣有蟠冢山漢水
北九十里山海經漢水出鮒嵎山蓋蟠冢之異名也本

在漢中郡沔陽縣界後魏正始中析沔陽置蟠冢縣屬
華陽郡故地初改置西縣故隋志云西縣有蟠冢山唐
屬梁州大業初改置西縣故隋志云西縣有蟠冢山唐
武德二年括地志云蟠冢山在綿谷縣之通谷鎮置金
其境故縣有三泉故震宇記云蟠冢山在綿谷鎮置金
云金牛縣有三泉故震宇記云蟠冢山在綿谷鎮置金
道復置三泉縣故震宇記云蟠冢山在綿谷鎮置金
界復置三泉縣故震宇記云蟠冢山在綿谷鎮置金
之言漢水以泉縣隸軍故輿地紀勝引宋朝郡縣志云
地理通釋云蟠冢山在大安縣蟠冢山為源後又省三
統志云漢水出大安縣蟠冢山為源後又省三泉縣
縣又於縣西南置大安縣蟠冢山為源後又省三泉縣
蓋此山在漢沔中府志云蟠冢山在甯州北九十里
山之名曰蟠冢山則一皆在古梁州之域其為禹貢之
羌地無疑也又云蟠冢山孔傳不言所之郡縣而正
蟠冢無疑也又云蟠冢山孔傳不言所之郡縣而正
義引地理志以實之曰隴西郡西縣蟠冢山漢水所
出夫此水即嘉陵水之上源非禹貢之所謂蟠冢導漾

東流為漢者也而班固以西縣之嶓冢為禹貢之嶓冢
謬矣自是以後言嶓冢者率依班氏自後魏正始中析
沔陽地置嶓冢縣以表其山而名始著鄴道元卒于孝
昌二年上距正始置縣以表其山而名始著鄴道元卒于孝
所親見而注水經不言豈事在成書之後不及追改抑
亦因其晚出而疑之乎然漾水注引漢中記曰嶓冢以
東水皆東流嶓冢以西水皆西流故俗以嶓冢為分水
嶺作者亦似知班志之謬而以西縣嶓冢為禹貢之山
也考乎然于漢中記奚為詳及隴西之山耶穎達豈未
繫氏道之下不言出某山自水經云嶓冢出嶓冢道出武
都氏道而嶓冢道亦有嶓冢矣常璩華陽國志云東源出武
矣郭璞注山海經云嶓冢俱出嶓冢而武都氏道南鄴道元
注水經云東源出嶓冢而武都氏道南鄴道元
輒轉迷惑愈久而西縣嶓冢而武都氏道南鄴道元
故城在今秦州西南氏道貢之嶓冢幾不可問矣西縣
隴西沒于氏羌郡無之則其縣之不可考久矣要之二縣
而晉志武都郡無之則其縣之不可考久矣要之二縣

在隴西皆古雍州域也而禹貢嶓冢乃梁州之山不應
闕入雍域故惟魏收所言為得其實又云漢志隴西
縣下云禹貢嶓冢山行二千七百六十里此與道之
至江州入江過郡四行二千七百六十里此與道之
出隴西無交涉水經非一時一手作漾水篇首云漾水
依漢志氏道一條以立文惟加嶓冢沮縣為漢水此不
所謂漢水即東漢也亦與西縣之嶓冢沮縣為漢水此
橫決必魏晉間人所續也尋其意旨蓋以氏道南合
濁水兩當溪歷槃頭郡東而南為西漢水也故鄴注以
為東西兩川俱出嶓冢而通要皆自嶓冢地勢東而西
漾沮雖有枝津與西漢通要皆自嶓冢地勢東而西
也蓋嶓冢巨絕陽縣南入甯羌州界即折而西南避高
就下其性則然豈有東入之理澄之所謂西貢之潛
仲雍所言即通谷水也東入之理澄之所謂西貢之潛
漢水而說者乃謂西漢水至葭萌入漢顛倒之矣今嶺
東漾沮枝津皆入西漢嶺西溪澗之水亦皆入西漢川
流去來有目者盡能驗之其可古而非乎又曰水
經依漢志以為言漢志以沮水枝津上承氏道水下為

東漢水氏道雖未詳其處所以地望度之當在西縣之
東河池之西上邽之南其北蓋自氏道來也其中或有
水宏休水渥水者但今無可考耳然沮水作記者不察地
漢志所謂養水者西入東也昔以觀水作記者不察地
濟自高下不辨川流之去來遂以為漢源也然漢志不言
勢當溪由津以達沮河是為東漢源也然漢志不言其
也班固因之故有此誤水經曰漢源也然漢志不言其
亦以氏道水通沮水為東漢源也然漢志不言其
山矣常璩知其非是故又因水以名其山曰漾山而為
之殊目要之氏道水所出別是一山非漾山也又云陸
游曰嘗登嶓冢山有泉涓涓出山間是為漢水之源務
觀入蜀塗歷金牛山泉涓涓出山間是為漢水之源務
始出山為漾水也新王尚書士禎撰蜀道驛程記其
言嶓冢最詳如棧道但山庫無林木河折流亂山中河
水流湍悍耳西涉沮水抵大安驛狹者才二三尺沙石
見嶓冢深沒蹀自大安西南亂山益稠至金牛驛北望

漾者也水纒濫觴不沒鳧雁合五丁峽水東流為河其
流始大金牛驛西三里稍南入五丁峽一名金牛峽
口懸崖萬仞陰風颯然水自峽中噴薄而出甯羌州在
亂山中無城堞本沔縣羊鹿坪地明洪武中以山寇作
亂置甯羌衛于此成化中即衛建州治自州行十里渡
水過百牢關于嶺下水皆南流迤東水皆北流五丁峽水
北合漾水入沔嶺下水皆南流迤東水皆北流五丁峽水
水為川江常璩言沔出山有二水為西漢明與導漾
之文相悖按通典嶓冢山在秦州源出嶓冢山一在漢
中金牛雍大記云西漢水在秦州源出嶓冢山一在漢
與馬池水合此乃上邽之嶓冢在今秦州源出嶓冢山
縣嶓冢山東流入金州此乃嶓冢之流也嶓冢有二則
漾乃源流各自了然漾之與沔本為一流與隴西之嶓
冢都無交涉常氏之誤不可不辨而自明矣又云禹貢以
嶓冢繫梁州而漢志嶓冢在雍域之隴西一誤也禹貢
云嶓冢導漾而漢志嶓冢在雍域之隴西一誤也禹貢
出氏道二誤也禹貢之潛乃漾水枝津西出為漾水則
而漢志西漢水出西縣之嶓冢三誤也漢志不言漾水
出何山而水經云出氏道縣嶓冢山是氏道亦有嶓冢

水經注釋卷二十一

力系治平漾水
四誤也漾者東漢之源而續水經者以西漢水接漾水
爲一川五誤也葭萌入漢六誤也川流地上離合灼然可
云西漢水至葭關駟之說以爲原始要終潛流或一故東
見而酈注惑闕駟之誤也羣言淆亂學爲靡之別源以
說漢水當排棄之諸家專主禹貢以沮沔爲漢之別源以
西漢爲漾之枝津而氏道水則存而不論是亦理亂意
解連環之術也東樵之言剖判析而西漢之誤始班志竊
則猶有未安者水經以漾水冒于西漢之誤而東漢之
源僅以沮沔枝津當之是禹貢漢水于氏道云禹貢出
謂不然班志隴西縣下禹貢漢水于氏道云禹貢出
猶恐人誤以武都爲漢武都下漢水受氏道云禹貢出
養水所出至武都爲漢武都下漢水受氏道云禹貢出
名沔過江夏謂之夏水入漢中沔源不知氏道之所在
都東南入江氏道水今人既不知氏道之所在
又烏能必養水之不出于氏道乎夫河源渺茫隔在異
域尙可追尋况氏道雖陷氏道當漢盛時猶隸版籍班
氏之記載非盡無稽也由氏道而沮漢時猶隸版籍班
至流脈絡貫分沮武都沮縣下沮水出東狼谷南

水經注釋卷二十一
西漢之所出氏道之養水乃大禹之所導班志明言之
而猶歸過于班氏班氏不受也道元知水經漾水以彌縫
也于是欲于禹貢嶓冢導漾之外別求一漾水以彌縫
其失而卒不可得也乃東樵則以此魏書地志華陽郡
嶓冢縣有嶓冢山漢水出焉執此以爲班志華陽郡
漢水出自嶓冢山漢水出焉執此以爲班志華陽郡
經則以爲東嶓冢山漢水出焉執此以爲班志華陽郡
而名之曰嶓冢山漢水出焉執此以爲班志華陽郡
西漾水出自嶓冢山漢水出焉執此以爲班志華陽郡
而強爲附和哉道元豈能逆料五百餘年以後之所謂
所謂河漢者也尙書禹貢嶓冢導漾東流曰沮口所追稱
酈亭負此長寬而補正之功不淺猶云成書未及追改使
夫二子即博學嗜古其所涉歷按遠乘傳以爲目驗得之
率然斷以氏道水之弱也禹貢梁州岷嶓既論也豈況
夫嶓冢一山誠非小弱也禹貢梁州岷嶓既論也豈況
云導嶓冢至荆山岷嶓之陽至衡山岷嶓既論也豈況
導嶓冢至荆山岷嶓之陽至衡山岷嶓既論也豈況
輕嶓冢與岷未云多讓東樵亦云觀漢志云岷山在徽

漢中東流為漢水遙與前逾于河傳漢上曰河相照應
補出此句最佳余欲以班志沮縣下注沮水出東狼谷
南至沙羨南入江取武都縣下注一名沔過江夏謂之
夏水十字補入東狼谷之下南至沙羨之上漢水原委
方備又曰常璩稱漢有二源以東源為即禹貢之漾水
極是與水經各一書非承水經而為文者獨道元于水
經以西漢水為漾水曲徇其說甯取山海經闕氏荒誕
之說曰川流有潛通之理故漾漢互稱至敘次通谷水
曰上承漾水西南流為漢水漾水之稱仍屬東漢酈氏
微意居然可睹矣潛邱之言如此是故山連麓而水異
源山連麓故上邽之嶓冢與金牛之嶓冢皆為禹貢之
山水異源故西漢水為大禹所疏通則已著于康成之
說豈後人所得而妄加之哉說者猶以班志隴西西縣
禹貢嶓冢為疑夫夫雖善辨卒不能滅秦州嶓冢之名
則何如取隴東之山皆嶓冢
一語深思而細繹之也哉

丹水出京兆上洛縣西北冢嶺山

一名高豬山也丹水東南流與清池水合水源東北出

清池山西南流入于丹水

東南過其縣南

縣故屬京兆晉分為郡地道記曰郡在洛上故以為名
竹書紀年晉烈公三年楚人伐我南鄙至於上洛楚水
注之楚水源出上洛縣西南楚山昔四皓隱于楚山即
此山也其水兩源合舍于四皓廟東又東逕高車嶺南
翼帶衆流北轉入丹水嶺上有四皓廟丹水自倉野又
東歷兔和山即春秋所謂左師軍于兔和右師軍于倉
野者也

又東南過商縣南又東南至于丹水縣入于洵

契始封商魯連子曰在太華之陽皇甫謐闕駟竝以爲
上洛商縣也殷商之名起于此矣丹水自商縣東南流
注歷少習出武關應劭曰秦之南關也通南陽郡春秋
左傳哀公四年楚左司馬使謂陰地之命大夫士蔑曰
晉楚之盟好惡同之不然將通于少習以聽命者也京
相璠曰楚通上洛阨道也漢祖下浙酈攻武關文穎曰
武關在浙縣西一百七十里宏農界也丹水又東南流
入曰口歷其戍下又東南浙水出浙縣西北宏農盧氏
縣大嵩山南流逕修陽縣故城北縣卽浙之北鄉也又
東入浙縣流結成潭謂之龍淵清深神異者舊傳云漢

祖入關逕觀是潭其下若有府舍焉事旣非恆難以詳
矣其水又東逕其縣故城北蓋春秋之白羽也左傳昭
公十八年楚使王子勝遷許于浙是也郭仲產云相承
言此城漢高所築非也余按史記楚襄王元年秦出武
關斬衆五萬取浙一十五城漢祖入關亦言下浙酈非
無城之言修之則可矣浙水又歷其縣東王莽更名縣
爲古亭也一清按漢志作君亭而南流入丹水縣注于丹水故丹
水會洵有浙口之稱丹水又東南逕一故城南名曰三
戶城昔漢祖入關王陵起兵丹水以歸漢祖此城疑陵
所築也丹水又逕丹水縣故城西南縣有密陽鄉古商

密之地昔楚申息之師所戍也春秋之三戶矣杜預曰縣北有三戶亭竹書紀年曰壬寅孫何侵楚入三戶郟者是也水出丹魚先夏至十日夜伺之魚浮水側赤光上照如火網而取之割其血以塗足可以步行水上長居淵中丹水東南流至其縣南黃水出北芬山黃谷南逕丹水縣南注于丹水黃水北有墨山山石悉黑績彩奮發黝焉若墨故謂之墨山今河南新安縣有石墨山斯其類也丹水南有丹崖山山悉頰壁霞舉若紅雲秀天二岫更爲殊觀矣丹水又南逕南鄉縣故城東北漢建安中割南陽右壤爲南鄉郡逮晉封宣帝孫暢爲順

陽王因立爲順陽郡而南鄉爲縣舊治鄧城永嘉中丹水浸沒至永和中徙治南鄉故城城南門外舊有郡社柏樹大三十圍蕭欣爲郡伐之言有大蛇從樹腹中墜下大數圍長三丈羣小蛇數十隨入南山聲如風雨伐樹之前見夢于欣欣不以厝意及伐之更少日果死丹水又東逕南鄉縣北興甯末太守王靡之改築今城城北半據在水中左右夾澗深長及春夏水漲望若孤洲矣城前有晉順陽太守丁穆碑郡民范甯立之丹水逕流兩縣之間歷於中之北所謂商於者也故張儀說楚絕齊許以商於之地六百里謂以此矣呂氏春秋曰堯

有丹水之戰以服南蠻卽此水也又南合洵水謂之淝

口

水經注釋卷二十終

海甯錢保塘

華陽吳祖椿

覆校

中

